



BANN. CLUB. 16

ECS. CC. 16



















x

DE VITA ET MORTE  
ROBERTI ROLLOK,  
ACADEMIÆ EDINBURGENÆ PRIMARI,  
NARRATIONES;  
AUCTORIBUS GEORGIO ROBERTSON,  
ET HENRICO CHARTERIS.

---

EDINBURGI:  
TYPIS JAC. BALLANTYNE ET SOC.  
MDCCCXXVI.





AT A MEETING OF THE COMMITTEE OF MANAGEMENT OF  
THE BANNATYNE CLUB, HELD IN THE HOUSE OF THE PRE-  
SIDENT, 28TH MAY 1824,

RESOLVED, That the Life of ROBERT ROLLOK, First  
Principal of the University of Edinburgh, written by the Rev.  
GEORGE ROBERTSON, and originally published in 1599, and a si-  
milar Narrative by Principal CHARTERIS, contained in a MS. in  
the Library of the University, with Elegies on his Death, be printed  
for the use of the Members of the Club ; and that the REV. DOC-  
TOR LEE be requested to superintend the publication.

DAVID LAING, *Secretary.*



# THE BANNATYNE CLUB,

JULY MDCCCXXVI.

---

SIR WALTER SCOTT, BART.

PRESIDENT.

THE RIGHT HONOURABLE WILLIAM ADAM, LORD CHIEF  
COMMISSIONER OF THE JURY COURT.

SIR WILLIAM ARBUTHNOT, BART.

JAMES BALLANTYNE, ESQ.

5 SIR WILLIAM MACLEOD BANNATYNE.

THE LORD BELHAVEN.

GEORGE JOSEPH BELL, ESQ.

ROBERT BELL, ESQ.

WILLIAM BELL, ESQ.

10 WILLIAM BLAIR, ESQ.

JAMES CAMPBELL, ESQ.

HONOURABLE JOHN CLERK, LORD ELDIN.

WILLIAM CLERK, ESQ.

HENRY COCKBURN, ESQ.

15 ARCHIBALD CONSTABLE, ESQ.

DAVID CONSTABLE, ESQ.

JAMES T. GIBSON CRAIG, ESQ.

WILLIAM GIBSON CRAIG, ESQ.

GEORGE CRANSTOUN, ESQ.

20 ROBERT DUNDAS, ESQ.

THE COUNT DE FLAHAULT.

JOHN FULLERTON, ESQ.

- SIR JAMES G. R. GRAHAM, BART.  
ROBERT GRAHAM, ESQ.
- 25 THE LORD GRAY.  
E. W. AURIOL HAY, ESQ.  
JAMES M. HOG, ESQ.  
JOHN HOPE, ESQ.  
DAVID IRVING, ESQ. LL.D.
- 30 JAMES IVORY, ESQ.  
SIR HENRY JARDINE.  
FRANCIS JEFFREY, ESQ.  
JAMES KEAY, ESQ.  
JOHN G. KINNEAR, ESQ.
- 35 THOMAS KINNEAR, ESQ. **TREASURER.**  
DAVID LAING, ESQ. **SECRETARY.**  
REVEREND DOCTOR JOHN LEE.  
HONOURABLE J. H. MACKENZIE, LORD MACKENZIE.  
JAMES MACKENZIE, ESQ.
- 40 JAMES MAIDMENT, ESQ.  
THOMAS MAITLAND, ESQ.  
GILBERT LAING MEASON, ESQ.  
WILLIAM HENRY MILLER, ESQ.  
THE EARL OF MINTO.
- 45 JAMES MONCRIEFF, ESQ.  
JOHN ARCHIBALD MURRAY, ESQ.  
WILLIAM MURRAY, ESQ.  
MACVEY NAPIER, ESQ.  
ROBERT PITCAIRN, ESQ.
- 50 JOHN RICHARDSON, ESQ.  
ANDREW RUTHERFURD, ESQ.



THE RIGHT HONOURABLE SIR SAMUEL SHEPHERD, LORD  
CHIEF BARON OF SCOTLAND.

ANDREW SKENE, ESQ.

JAMES SKENE, ESQ.

55 GEORGE SMYTHE, ESQ.

JOHN SPOTTISWOODE, ESQ.


ALEXANDER THOMSON, ESQ.

THOMAS THOMSON, ESQ. VICE-PRESIDENT

W. C. TREVELYAN, ESQ.

60 PATRICK FRASER TYTLER, ESQ.





Vitæ & mor-  
TIS D. ROBERTI  
ROLLOCI

Scoti nar-  
ratio.

*Scripta per Georgium Ro-  
bertsonum.*

Adjectis in eundem  
*quorundam Epita-  
phijs.*



EDINBURGI  
*Apud Henricum Charteris.*  
1599.



VITÆ ET MORTIS  
D. ROBERTI ROLLOCI

NARRATIO.

---

**ROBERTUS ROLLOCUS** Rector Academiæ et Pastor Ecclesiæ Edinburgensis, ubi ætatis suæ annum 43. explevisset, 6. Idus Febr. anno 1598. non sine summo omnium luctu supremum diem obiit. Vir, ne celem quod sentio, vita innocentissimus, eruditione florentissimus, propositoque omnium sanctissimus quos unquam tulit hæc regio. Hic mihi dicendus an silendus esset, diu multumque ambigebam : silendi prompta facultas, dicendi provincia humeris impar : cum enim mecum reputarem quam locupleti cœlestium donorum suppellectile ditatus ille fuerit, quanta in Deum pietate claruerit, in Ecclesiam amore flagraverit, in Principem et Patriam affectu ferbuerit, verebar ne tam eximia virtutum monumenta stili mei nube obfus-

carem potius quam illustrarem. Mœrore etiam Ecclesiæ ejus obitu benigno parente orbata, Reipublicæ principi alumno viduatæ, exhausta memoria mea, hebetata mentis acies, exaruit denique sermo. Sed et animoolvebam quorundam solennem consuetudinem, celebrandi etiam profanum genus hominum, quos jam claudit gehenna, eorumque encomiis multijugas paginas refarciendi, ac in iis umbratilia tantum virtutis simulacra ad cœlos usque laudibus evehendi. ROLLO-LOCUM autem dum superesset veræ virtutis thesaurum, nunc autem cœlestis Hierusalem incolam, diuque cupita fruentem gloria, oblivionis ac silentii tumulo sepelire nefas putabam. Pensitabam etiam quam innumeris vinculis adamantinis me cum aliis plurimis sibi devinxerit ut non sine nefario scelere tantum virum taciturnitate operire me posse putem. In hoc consiliorum bivio cunctabundus diu hæseram, silentiumne an sermonem de tanto viro capesserem: tandem diuturnam cunctationem abrui, inque eam sententiam descendi, non verborum illecebris, aut lenocinio orationis, ejus laudes amplificandi qui jam beatas sedes incolit, inexhaustoque saturatur gaudio in vultu Dei et Agni scaturiente. Verum animo meo statui ejus vitæ ac mortis inclytarumque virtutum effigiem, quam fieri potest expressam, depingere, ejus pulchritudine allecti nos qui ei supersumus, ad vitæ ejus sanctissimæ vestigia premenda sollicitemur, vitamque hanc nostram consimili exitu felici ac honore claudamus. Et quamvis ego

deterioris notæ pictor sim, qui tam illustris effigiei lineamenta meo cælo ac penicillo ducam, Deo tamen auspice ac propitio, aggrediar tenui illa ac exili facultate qua valeo.

ROBERTUS ROLLOCUS natus anno 1555. inclyta LEVINGSTONIORUM familia oriundus, parentibus celebribus satis, ac decoris, inter binos quos habuerat fratres ætatis mediæ fuit. Pater DAVID ROLLOCUS, quod aliquam in Republica literaria suavitatem ipse hausisset, filios suos omnium, artium liberalium cultura excolendos curavit. Inprimis ei curæ fuit hic ROBERTUS, quod aliqua futuræ egrægiæ in eo indolis præsentia præsensisset : eum Sterlinum amandat scholis trivialibus expoliendum, tradiditque THOMAE BUCHANANO Sterlinensi Ludimagistro, sub quo tam illustre ingenii specimen in ipsa juvenia edidit, tam compto morum decore nituit, ut absque rigidiori disciplina in officio permaneret. THOMAE autem BUCHANANI affectum, mellita indolis suæ suavitate ita in se convertit, ut perpetuis incrementis adauctus ad vitæ usque periodum nunquam exoleverit. Ubi Sterlini in studiis humanioribus satis maturuisset, Andreadopolim commigrat, ad studia sublimiora Philosophica nimirum capessenda. Ingressus autem Academiam cognomento Salvatorianam, in ea quadriennii curriculum Philosophicum emensus est, ubi quæ prius in eo scintillarunt virtutes, indies splenduerant :

tam autem sublime horum studiorum fastigium conscendit, ut ex con-  
discipulis pauci eum assecuti, nemo anteierit. Completo hoc curri-  
culo, ob eximia quæ in eo patuere dona, in professorum Philosophiæ  
numerum relatus est: hac autem præfectura egregia cum laude  
quadriennio perfunctis, tanta industria ornavit, pietate illustravit, ut  
ex ejus collegis nemo eum æquaverit.

Anno 1583. Senatus Edinburgenus de erigenda EDINBURGI  
ACADEMIA cogitare cœpit, idque suggestu viri integerrimi  
JACOBI LAUSONII Pastoris Edinburgeni: cogitatio hæc hinc  
conflata, quod regni Metropolis esset, animadverteretque Senatus  
non sine civium, cum molestia, tum impendio esse, liberos An-  
dreapolin aut alias regni partes erudiendos ablegare, nec igno-  
raret complures tenuioris sortis sic angustia rei familiaris con-  
strictos, ut sumptus alibi quam Edinburgi educandis liberis tolerare  
nequirent, ac proinde coactos plerunque sublimia ingenia servilibus  
artibus mancipare. Ubi decretum erigendam Academiam, tum venit  
in deliberationem, quisnam ejus præfecturam subiret, cujus salvis  
auspiciis, exordium, incrementa, fastigium caperet. Placuit tandem  
unum aut alterum Andreapolin transmittere, qui diligenti indagine  
sciscitarentur quisnam huic operi apprimè idoneus esset: concordia  
universæ Academiæ suffragio neminem tam ad provinciam hanc in-  
structum ac ROBERTUM ROLLOM discunt, quod et ad Senatum



referunt. Senatus ubi hoc rescisset, blandè ROLLOCIUM invitavit, vellet tantum opus, cum ad Ecclesiæ, tum Reipublicæ insigne emolumentum auspiciari, se nulla in re ei defuturum, quibuscunque posset officii ornaturum, tandem ejus adventum impetrat. Anno eodem Edinburgum trajicit ROLLOCIUS, humaniterque, (ut par erat) a Senatu excipitur.

Ineunte hyeme provinciam hanc adoritur, classemque ipse inchoat : vulgata autem fama erectæ Edinburgi Academiae, turmatim ex omnibus regni angulis Edinburgum confluunt qui studia Philosophica ambiebant, in unam classem coalescunt. Ex iis autem plerosque laxiori trivialium scholarum disciplina effrenes, in limine rigida severitate mirè compescuit, severitatem tamen insita quadam sibi clementia prudenter temperavit : doctrinam autem qua eos imbuit, disciplinam qua coeruit, Religionis condimento sic miscuit, ut guttatim tenellis juvenum animis pietatem instillaret. In hoc enim inprimis omnes nervos intendit ut discipulos suos sanctimoniae characterem insigniret, nec conatum tam pium successus frustrabatur, tantum siquidem hortationibus, prælectionibus sacris, quibus alia studia distinxerat, profecit, ut efferatos juvenum animos cicuravit, ac in sancti obsequii gyrum redegerit. Ubi quadriennio ad curriculum Philosophici exitum classem hanc perduxisset, ejus singulos ad examinationis amussim exactos, laurea, quam Magistralem vocant, donavit.

Visum deinde Senatui quatuor Philosophiæ professores, eruditione, morum nitore, prudentia insigniores, ROLLOCO sufficere, classibus Philosophicis præficere, qui ejus imperio ac nutu Academicam administrarent. Ex iis autem quos nuperrimè laurea redimerat, quatuor qui facto examine reliquis præluxerant, eliguntur. Hi gressibus, cum doctrinæ, tum disciplinæ, ROLLOCI insistentes demandatam sibi provinciam egregia fide ac industria administrant.

ROLLOCO interim totius Academiæ cura incubuit, illi enim moris erat, singulas classes adire, singulorum sedulitatem, progressus in studiis, observare, si quæ turbida excidissent, egregia celeritate ac prudentia componere, universos, singulos ad perstandum in officio erigere. Quotidie omnibus in auditorium convocatis, intenso animi ardore preces ipse celebrabat. Unius diei cujusque hebdomadæ delectum fecit, quo discipulis suis omnibus coeuntibus, textum aliquem scripturæ interpretatus est, unde hortationes, comminationes salutares eruit, non sermonis fucō obductas, verum sententiarum pondere ac gravitate efficaces ad juvenum animos emolliendos, ac ad sanctimoniam efformandos : non quod defuerit ei comptus ac cultus sermo, in rebus tamen sacris affectatum dicendi genus aspernabatur : illi enim cura intensior de rerum nervis ac medulla, quam orationis procera cute. Hujus prælectionis vallo, arctiùs quam asperiori ulla disciplina adolescentes circumsepsit. Absoluta jam lectione, scrutari deinde

cœpit ex censoribus, quos ad delictorum censuram destinarat, quamnam ea hebdomada delicta excidissent, citatos delinquentes tanta dexterritate increpuit, iram divinam sic intonuit, dedecorisque metu attonitos reddidit, ut ad pœnitentiam, vitamque in melius emendam, mille verbera non tantum valuissent. Quibus enim nec aliorum verba aut verbera dolorem incutere, lachrymas excutere quiverant, cœlestem iram intonando, blandis promissis mulcendo, sic eos concussit, prostravit, ut suspiria, singultus, fletus uberrimos exprimeret. In eo autem insigne fuit, sive promissiones Evangelicas prædicaret, sive severè minitaretur, ita se etiam nequissimi animo, adversus quem vehementissimè excanduisset, insinuavit, ut profusum ejus in se amorem derivaret, neque tam metu, quam amore ad ultro-neum obsequium traduceret. Quotannis autem Adolescentum ob progressus in Philosophia laureatorum examen unum enitebatur, ex quo ditio-rem segetem Ecclesia, Respublicaque messuerat, quam ulla hominum memoria hæc Regio tulit.

Ipsè autem ROLLOCUS a studiis Philosophicis ad Theologica se seposuit. Adolescentes ubertim Philosophia imbutos, ad munus Pastorale aspirantes, per diem ac per noctem diligentia, indefesso labore Theologia excoluit. Cum ad eam sedulitatem, eas ærumnas, quas in adolescentibus his sacra hæc scientia inbuendis, tanta cum animi æquitate toleraverat, lumina reflecto, nequeo mihi ab admiratione

temperare, et nisi ipse earundem testis exstitissem, nemini eadem narranti fidem astruerem. Diem enim totum, demptis alimenti intervallis, collocare consueverat, aut in sublimi capitum Religionis contemplatione, aut in abditorum scripturæ locorum scrutinio, aut denique in controversiis cum Pontificiis dirimendis. Ista autem quamvis sublimia et excelsa, mira facilitate etiam ad quorumvis captum expediebat. Hanc autem sedulam ejus operam condierat hortationibus crebris quibus adolescentes ad sanctimoniam, fidemque, in munere Pastoralis iucitabat. Flagitavit imprimis ne crudos se ac immaturos ad munus illud protruderent, zelum eorum amplexibus hortatu crebro insinuaverat, verum prudentia conditum, dextereque monuit, ne juvenilem ardorem, choleramve, aut innatam, aut aliunde conflatam, aut denique ad imitationem compositam, quantumvis pietatis supparò tectam, in Ecclesiam inveherent: fovendum quidem in Ecclesia zelum genuinum, esse eum ignem cælitus descendentem quem ali in Templo Dei operæ pretium esset, explodendum tamen zelum adulterinum, quod ignis sit peregrinus. Obnixè autem serioque suasit ne res suas privatas prætextu Religionis gererent, neque famam sinceritatis alios sugillando, taxando, propagarent: hortatus denique nihil opinionis, omnia conscientiæ gratia, agerent. Hanc ejus indefessam sedulitatem tantis fructibus beavit Deus, ut innumeros cum ad Reipublicæ emolumentum, tum ad munus pastorale

decennii spatio propulerit, in quibus sanctimoniam ac eruditionis sue lineamenta cernere erat.

Ad hos labores tanta industria exantlato, accedebat et hic. Singulis diebus Dominicis palam in templo concionabatur, idque tanta spiritus demonstratione, tanto sententiarum pondere, verborumque gravitate, ut apud omnes excelcissimè floruerit: tantum ad auditorum mentes illuminandas, affectusque permovendos valuerat. Neque apud vulgus modò, sed et apud celebre et eruditum hominum genus concionando sic efficax fuit, ut quamplures in margine Orci lethalis titubantes, ad vitam illam Dei, lucemque cœlestem eruerit ac evocarit, divino munine eius ministerium secundante. Complures commentarios in Scripturas sacras, tractatus etiam nonnullos de Religionis capitibus miro artificio contextuit, quorum aliqui typis excusi, non modò in Scotia, sed et apud exterarum regionum incredibili nominis sui ornamento, Ecclesiamque insigni compendio per multorum manus volitant. Pervenerat fortè in manus THEOD. BEZÆ, eximii illius viri, ejus commentarius in Epistolas ad Romanos ac Ephesios, qui tanto gaudio Bezam perfudit, ut in epistola qua familiarem quemdam salutem in celebres ejus laudes eruperit: visum est aliqua ejus verba attexere. “ Hoc ipso tempore mihi contigit thesaurum nancisci, qui nescio quo sinistro fato, quamvis hic in omnium aliorum conspectu versaretur, me tamen adhuc subterfugerat: the-

saorum enim cur non appellem, et quidem pretiosissimum, illos honorandi summè fratris, D. ROLLOCI, cum in Epistolam ad Romanos, tum in Epistolam ad Ephesios, utramque inter Apostolicas omnes celebratissimam, commentarios? Sic enim ego quidem de iis apud me statuo, (quod absque ulla specie adulationis dictum velim,) nihil adhuc legisse me in hoc interpretationis genere, brevius simul, cum elegantius, tum judiciosius, scriptum, ut ipse me iis inspectis continere nequiverem, nec etiam opinor debuerim, quin et Deo, de hoc utilissimo procul dubio quam plurimis futuro labore gratias magnas agerem, et tantum hoc vobis bonum vel toti potius Ecclesiæ gratularer, Deum precatus ut hunc hominem novis subindè donis auctum feliciter conservet, hoc præsertim tempore, in quo propter tantam operariorum in excolenda Dei nostri vinea raritatem, et paucissimis ex veteranis illis exercitatissimis superstites triumphare jam sibi de oppressa veritate Satan cum suis videbatur." Hæc BEZA.

Sensim autem omnium cujusque ordinis quibus innotuerat, animos sui amore repleverat: gratum charumque juxta omnibus reddidit candor quidam in rebus gerendis genuinus, insignisque humilitas, quantum ex alto eximia in eo dona illuminavit: quamvis enim ille præclaris dotibus Pastores reliquos superemineret, sese tamen suo censu infra omnes demisit. Animo quidem fixum condebat latere, ut que liberius studiis dicaretur semet abdere ne curis publicis implica-

retur: præter votum tamen ad publica negotia pleraque invitus evocabatur, quæ quidem ille egregia sanctissimaque prudentia expedierat. Præcipiti plebis zelo turbata, maturo ejus consilio in ordinem redierunt: rara zeli socia prudentia, nec assiduus prudentiæ comes zelus, utriusque tamen insignem temperiem ROLLOCO indiderat qui munera tacito dispertit arbitrio, quam sensit cum Ecclesia tum Respublica Scoticana cum insigni suo emolumento sibi salutarem.

Novissimo vitæ biennio sic curis publicis involvebatur, ut ejus valetudo hostilis satis indies labasceret: assiduus enim calculi cruciatibus angebatur, stomachi infirmitate languescebat, verum quantum judicio humano consequi valeamus, nisi hoc ipso tempore Ecclesiæ nutanti ac periclitanti opera sua subvenisset, in miseriarum Oceanum pesundata fuisset. Inconsulto armatæ plebis concursu, Regis ac Senatorum ira vehementissime exarsit, quo factum ut Ecclesia et Respublica in præruptum et anceps periculum devolveretur: squalida enim ac lugubris rerum conditio quæ tum temporis evenerat, truce[m] lachrymabilemque faciem spectantibus præbuit: cum in turbis his componendis complures operam et oleum perdidissent, eluxit tandem, tanquam sidus salutare, sanctissima ROLLOCI prudentia. Pietate ac sapientia, humilitate conditis, tantum Regii pectoris possederat, ut ejus animum in Edinburgenos asperiores lenierit, Ecclesiam ex incendio, Rempublicam ex conflagratione eruerit: Quamvis ROL-

LOCO insignis assurgat honos quod hac tempestate lugubria Ecclesiae detraxerit, turbata ad pristinum statum revocarit, cogor insignia nominis ejus ornamenta silere ac transilire. Si enim illius temporis historiam pertexerem, rotæ instar rapidive gurgitis agerer, ut in præsentî negotio consistere nequirem, longeque digrediendum ac expatiandum mihi foret.

Res, ROLLOCI continuis vigiliis, ac indefessis laboribus compositas, ac in pristinum statum remeantes, insequitur Synodus Taodunensis, quam visum Regi sua præsentia ornare. Synodo Præses omnium suffragiis ROLLOCUS designatur. Synodo Perthi non multo ante habita, quæ severius ad speciem decreta videbantur, hac Taodunensi benigniorem commentarium sortita sunt. Flagitat Rex, vellet Synodus nonnullos designare, qui excubias pro Ecclesia ducerent, ne quid ea detrimenti caperet. Confestim pedibus itur in eam sententiam pietate ac prudentia eminentiores deligendos, iis provinciam hanc demandandam. Ex his ROLLOCUS unus. Horum munus temporis ac administrationis vallo circumseptum fuit, defunctique muneris rationem proximæ Synodo redderent decretum. Hi Ecclesiam, tumultu quem memorabam, miserè quassatam maturis consiliis ac perpeti industria reficere, sensimque restaurare adnituntur.

Anno 1598. præcipiti hyeme gravius solito morbi pondere gra-



vatus domi se concluderat. GULIELMUS SCOTUS ex intimis unus consulit in domum suam transiret, aërem sereniorum ac liberiorum hauriret, ut valetudinem recuperaret: consilio obsecundat, transitque. In limine pristinus vigor redire videbatur, verum confestim geminata morbi vis lecto eum affixerat. Ille cum spiritus linquentes, seseque in confinio mortis discit, cœlesti gaudio quo semper exuberabat, mellifluisque sermonibus omnes qui inviserant perfudit: verum lætitiã interpellabant abortivæ omnibus lachrymæ, tantum virum nondum matura ætate præripiendum, adimendum Ecclesiæ parentem, Reipublicæ salutare columnen, neminem superesse qui turbas in Ecclesia componat, offenso principi cives, Ecclesiam, insinuet. Ille prudentia solita domestica digerit uxoremque post decennii ultra sterilitatem uterum ferentem amicorum curæ seriò commendat. Ingressis ad eum PATRICIO GALLOVIDIO, DAVIDE LYNDÉSIO amorem in Principem qui semper ejus animo medullitus insedisset, testatum fecit, in eoque occubiturum se professus, flagitat interim ipsius nomine Regem adeant, hortenturque vellet Religionis orbitam, quam inoffenso cursu lucusque pressisset, gradu non vacillante ad ultimum vitæ spiritum calcare, neque spe amplificandi regni, aut nefariorum tacitis technis ab ea divelli. De Ecclesiæ Pastoribus, qua par esset reverentia, sentiret, loqueretur. Illud (inquit) Christi ministerium quantumvis humile ac abjectum

humano calculo, illustri gloria tandem fulgebit. Ingressi deinde Pastores Edinburgeni quibus assidentibus sic inquit. Ægritudinis mole lassus, vitæ hujus pausam ac exitum anhelans spiro, ac spero. Non sic Christum didici aut docui, quin in eo ærumnarum harum levamentum sentiam. Academiæ cura fratres altissime semper animo meo insederat, quanta ego eam fide ac industria administrarim, testis Deus, ego mihi probe conscius sum, quantum ex ea in Ecclesiam et Rempublicam emolumentum redundarit, vos testes. Rumpendum mox vitæ meæ filum, trajiciendumque mihi in patriam diu, multumque cupitam, ne quæso me dempto nimis amarè orbitatem suam defleat Academia: Vos, vos inquam, non novercæ verum genuini parentis vices obite, eam vestro sinu alite, fovete. Pastorale munus non jam pridem mihi incubuit, quod quamobrem in me susceperim non vos præterit. In eo egregium quid præstitisse me affirmare non audeo, voluisse tamen, audebo. Memoriae vestræ non excidit, Synodo Taodunensi delectum me cum aliis quibusdam, qui pro Ecclesia excubarem, in excubando, cum Dei gloriam, et Ecclesiæ incolumitatem, tumultu quodam miserè quassatam, mihi ob oculos habuerim, nullius in ea admissi flagitii pœnitentia disruciari me profiteor. In pastorum Edinburgenorum numero geminando, duobus præsertim illis qui studiorum tyrocinium sub mea ferula exercuerunt ad munus illud invehendis, cum in iis dona muneri congrua, Deum-

que eorum laboribus propitium, perspexerim, tantum abest illius facti me pœniteat, ut in hanc usque horam summo potius perfundar gaudio. Susurrauit quidam nuperrime in aurem meam, disseminatum rumorem, torqueri me animo ob inique gesta in ista provincia. Deum arcanorum omnium arbitrum ac testem, ad cujus tribunal ego nox sistendus, appello, cum in omni hoc negotio, pro divinitus indulta mihi pietate et prudentia, ad scopum legitimum collinari, nihil esse quod me cruciet aut angat. Non eo quidem inficias, cum Ecclesiam ac Republicanam nexu adamantino, eoque fraterno colligarit prudens mundi opifex, in hoc remis ac velis incubuisse me, ut mutua emolumenta promoverent: ne Reipublicæ gladius in Ecclesiæ perniciem stringeretur, aut Ecclesia in principem, aut rempublicam acerbè invaderetur, bellumque non necessarium excitaretur. Neque tamen ita me pacis amor fascinavit, ut genuinam ab adulterina non secreverim, aut affectus in Principem eò me abripuit, ut in ejus gratiam vel labeculam ullam conscientiae fuerim inducturus, verum meorum factorum candor etiam me extincto lucescet. Ceterum fratres unanimi concordia ad opus Domini coalescite. Quid magis incongruum quam pacis præcones, litigio ac discordiæ carnificina dilacerari, hac tempestate, qua in insidiis hostes sunt, non lite spargendæ vires, verum pace refovendæ sunt, petendum ac hauriendum hostium latus, non mutua jugula. Principi vestro debitum obsequium præstate: rara

temporum felicitas vobis obtigit, Principem nacti estis, qui cum lacte Religionem hausit, quæ ejus visceribus recondita cum eo calcavit, Religionem disciplina circumvallavit, circumvallatam suo præsidio textit, Ecclesiæque patrociniun sic in se suscepit, ut quam diu eum vita non deserat, illud non deserturum se documentis innumeris palam fecerit. Quod itaque blandè mulcendo ei elicere valetis, ne torquendo extorquere frustrà adnitimini. Serio cavendum ne ex hoc felicitatis fastigio pessum se det Ecclesia. Quiverat Paulus Onesimum fugitivum apud se retinere, renuit tamen ne Philemonis beneficium ex necessitate esse videretur. Ejus vestigiis insistendum vobis in tanti ponderis negotio sentio. Deus pater Jesu Christi, vos omni benedictione spirituali locupletet, fortique robore muniat, ad ministerium istud strenue obeundum.

Vesperascente eodem die, properare mors videbatur, quam ille odoratus, sermonem occipit, non humano cerebro excusum, verum cœlitus a Dei spiritu stillantem, qui cunctis astantibus stuporem injecerat. Aderant Medici qui medicamentis suis vim morbi lenire (quod vigor naturalis deficeret) renuerunt. Ad Deum itaque verso sermone : Tu, inquit, Deus medeberis mihi : dein preces zelo intensissimo fundit, orans primo vellet Deus sibi suisque peccatis propter unicum Christi sacrificium propitius esse, prædicans omnia quantumvis ad speciem speciosa, propter crucis Christi eminentiam, pro

stercoribus se ducere : precatus dein vellet vitæ suæ exitum faustum ac felicem indulgere, ut misericordiæ alis opertus, in Christi sinu occumberet, fruereturque Dei vultu quem crebro anhelitu intueri sitiit. Ego te, inquit, subobscure in verbi speculo vidi, largire mihi diu multumque optati vultus tui sempiternam fruitionem. De resurrectione et vita æterna verba promit, ac si terra derelicta in cœlos translatus fuisset. Singulis qui astabant dextra prehensis, tanquam Patriarcha, summa verborum sanctimonia ac gravitate benedicit : benedictionem hortationibus pro ejusque indole ac munere prudenter miscet. Ea nocte præter spem paulum requievit. Die qui eum insequutus est, urbani Magistratus, complures etiam ex ordine Senatorio eum invisunt, quos juxta lectum accumbentes sic affatur. Quantum præsagiis ullis assequi valeo, egrediendum mihi vitæ hujus limen, transeundumque in Patriam : neque hoc mihi acerbum, novissimum enim hujus vitæ diem crebra siti concupivi. Academia semper anxium me maxime habuit, eam ego jam deserturus, si celarem vos, quem meus calculus sufficiens mihi, Academiæque præficiendum censuit, incuriæ maculam non exuerem. Quid attinet exteras regiones pervagari, peregrinum asciscere, qui huic provinciæ præsit, quem interim doctrina disciplinaque hujus Academiæ lateat ? Domi virum locupletatum donis, ac ad munus instructum habetis, HENRICUM CHARTERISUM, qui eruditionem me Præcep-

tore uberrime hausit, professorisque Philosophici munus decennio egregia cum laude perfunctus est. Hunc vos in Academiae puppi sistite, ejusque clavo apponite, Deum illi propitium, ejusque labores beantem conspicietis. Vos ex officio Academiae Mæcenates ac alumni essetis, altior quæso ejus sollicitudo animos vestros subeat. De domesticis quid dicam, uxorem desero uterum ferentem, unum a vobis summo opere contendo, sentiat illa amorem quo semper me amplexi estis, extincto me, non exaruisse. Nunquam mihi dies aut nox ægritudinis expers, illa me tot morborum ærumnis quassatum, suaviter semper fovit ac refocillavit: ingenùè profiteor ex omnibus stipendiis meis non coacervavisse me obolos duos, nunquam enim mihi cordi aut curæ mundana hæc. Quorsum multa verba perderem: ne quæso affectus vester in me claudicet in eam. Magistratus, Senatores, solenni promisso fidem dant facturos se omnia ex animi sententia. Professores dein Philosophiæ ad perstandum in officio debitumque successori suo obsequium hortatur. His peractis, verba insigni sanctimonia ebulliunt. Deo meo, inquit, gratiæ, memoria, visus, auditus reliquique sensus mei tam vegeti quam unquam, ast ab hoc mundo alienatum cor meum, et quorsum Domine Jesu corde meo non fruereris, cui soli in illud jus, in hoc per omnem vitam incubui, ut illud tibi dicarem ac consecrarem, illud quæso assume, ut tecum commoretur. Hæc loquu-

tus, invadit eum lenis quidam somnus, ex quo experrectus summo anhelitu flagrat dissolvi, ac esse cum Domino. Veni, inquit, Domine Jesu, miseræ hujus vitæ filium abrumpe, matura domine ne tarda. Jesus me redemit non ut caducam hanc verum æternam vitam indulgeret. Veni Jesu, largire vitam propter quam redemisti me. Astantes flebili planctu vicem suam in ejus obitu deflent. At ille: Omnes vitæ hujus gradus emensus sum, ad novissimum perveni, cur retrogrederer? hunc gradum Domine Jesu tuo comitatu feliciter emetiar. Deduc me in eam gloriam quam per speculum tantum vidi: utinam apud te diversarer. Qui astabant significant diem posterum Sabbathum esse, unde hujus sermonis occasionem captat. Tuum Sabbathum Domine, æternum meum Sabbathum inchoet, auspicia sumat æternum Sabbathum meum à Sabbatho tuo.

In mediam ferè noctem modicam nactus est quietem, quam confestim morbi vis interpellat, supremamque horam adesse ratus, VALTERUM BALCANQUEILLVM invitat ad se venire: quo ingresso, hunc suscipit sermonem: Quod diutissimè munus Pastorale Edinburgi obieris, quodque non recens nostra amicitia, accersendum te curavi, ut reverentiam qua semper a cunis Christi ministerium reveritus sum, testatam facerem; ego quidem pro modulo doni preces in sinum Dei fudi, tu quæso pro me precum sacra peragito, ego corde ac affectu sequar, interim ne protrahi vitam hanc flagita. Provo-

lutis omnibus qui aderant in genua, preces celebrat Balcanquellus. Inter reliqua flagitat, vellet Deus tanti viri diuturniorem usuram indulgere, cum Ecclesiae ac Reipublicae salus tantopere eam poscant. Sic orantem interpellat, satias, inquit, mihi hujus vitae, unice in votis meis habeo vitam caelestem cum Deo in Christo reconditam. Consummatis precibus in verbi praedicationis illustria encomia resolvitur: Verbum, inquit, vita, mors, nec ulla ulli absque verbo salus: non est, credite mihi, flocci negotium verbum praedicare: perinde non est ac Platonis, Aristotelisve textum interpretari, aut orationem pigmentis ac lenocinio sermonis oblitam contexere: in sanctimonia, humilitate, efficaci spiritus demonstratione situm est verbi praeconium: quanti illud semper fecerim testis Deus. Dein ad preces revertitur, Veni, inquit, Domine Jesu, horum oculorum nervos rumpe, alios mihi largire: cupio dissolvi, ac tecum esse, matura venire Domine Jesu, ne ultra differ: egredere pusilla vita, ut ingrediatur melior illa vita Dei: insere Domine Jesu huic corpori manum tuam arripe tibi animam istam.

Ad Sabbathi auroram usque altum illi silentium, quod tandem hoc sermone abruptit, Veni Domine, ne morare: diei noctisque fastidio lassus sum, veni Domine Jesu ut ad te veniam. O dulce, faustum ac felix vitae hujus divortium, veni Domine dulcedo mea, emancipato animam hanc ut te marito suo fruatur, cor istud meum bipartire, ut



ad te caput suum transvolet. Regerit unus, huc usque cor tuum integrum possedit, integrum etiam assumet. Ille vero, partiri, inquit, cor istud postulo, ut vita hæc naturalis eruatur, et Christi vita infundatur. Tum ex astantibus unus, ne te anxietas acerbet, accelerat, Dominus tuus. Gratum, inquit, mihi istud nuncium : utinam die crastino exequias meas duceretis. Dein alter, Beata anima tam Domino vicina quam tua. Ille vero, in me nihil est, quod non ducaam pro stercorebus, ut Christum lucrificam, Christus unica solatii materia, omnis justitia mea pannus inquinatus. Interrogatus nunquid Pastoris ullius alloquiium flagitaret, respondit, non creaturum se iis molestiam, quod ad concionandum se accingerent. Sinite, inquit, me psittaci instar cum Domino meo balbutire. Certior factus inchoatam concionem, Da mihi, inquit, Domine ea videre, quæ in præsentia audiunt alii.

Sabbathi meridie sic eum affatur quidam, per omnem vitam tuam indefessa opera, sedulisque laboribus Dei gloriam promovisti. Ille, mihi unica gloriandi seges misericordia in Christo Jesu, alia omnia damna duco. Dein sopor quidam molis eum invadit, qui in vesperam occupat : quo discusso, ingressus ad eum ordinis Senatorii Præses, cui Edinburgi eo anno Præfectura obvenerat, eum sic alloquitur. Academiam amplexibus Magistratum, quibus tu Domine præses, seriò insinuavi, tu etiam eandem patrociniî tui gremio amplectere : experiatur

quæso te parentem ac Mæcenatem : Cum pro dignitate qua in Republica clares, ac illustri munere quo ornaris, Ecclesiæ opem ferre valeas, ne quæso eam subtrahe, in ejus præsidium artus ac vires tuas intende, nec interim salus tua quæ est in Christo memoriæ excidat, mundana hæc omnia fluxa sunt, moxque flaccescent. Deus te, tuam conjugem, universam familiam benedictionis suæ thesauro cumulet. Eadem illa nocte hæc verba excidisse ei observatum : Tranquilla mihi mens in corpore ægro, mortis, peccati, et Satanæ metu non angor, nullum illis in me imperium, sic tamen morbi pondere premor, ut longe præter spem in banc horam supersim. Ille quasi in mortario pistillo ægritudinis me tundit, ut ad regnum suum formet.

Die hebdomadæ secundo, mirum, inquit, videri potest, cum tam acerbè morbo coquar, quod in tantum protracta vita mea, verum per patientiam, domini beneplacitum præstolabor, connivebo, connivebo, agat ille mecum pro libito, non disseram cum eo. Quid est homo qui cum Deo argumentari audeat : imo, si in orcum detruderet, parendum non responsandum. Gratiam fac mihi Domine propter Christum lesam : non erubesco profiteri nunquam propectum me ad tam sublime notiæ Dei fastigium quam hoc morbo attigi. O quam horrendum in manus Domini incidere, sed reposita mihi misericordia in Christo. Quid contristaris anima mea, quid te dejicis in me, obveniet tibi mox aspectus et congressus

amœnissimus ? Ejusdem diei vespera, Experiior, inquit, sexti Psalmi veritatem, ac aliqua ejus verba recenset. Gratiam fac mihi, Jehova, quia languore pressus sum : cura me, Jehova, quia conturbata sunt ossa mea, etc. Interjecta modica pausa, sermonem iterat, Christus portabit jugum meum, et ego ejus gratia fultus sequar. Cum morbi acerbitate torqueri eum animadverterent astantes, lachrymas, planctus ac singultus cieunt, quos ille increpat : Ne meam vicem, ait, peccata vestra deflete, cum nemo a peccato immunis nemini fletus materia subtracta. Quod ad me, ego omnium complementum ac consummationem mox videbo. Ab hoc tempore oblatum alimentum respuit : Non, inquit, edam aut bibam quoad in regnum cœlorum invehar. Funeris curam GULIELMO LITILLO et GULIELMO SCOTO amicis integerrimis (quorum amicitiam non vacillantem frequenti elogio ornavit) commendat. Cur non, inquit, mihi hujus corporis cura, illud siquidem glorificandum et conformandum tandem glorioso Christi corpori ? et manus intuens, Istæ etiam manus illustri fulgebunt gloria. Ejus diei vespera ex cognatis unus ad eum ingressus, sermone impio bilem ei movit, ab eo hoc flagitat, vellet in- vectus in cœlos mediari pro se reliquisque amicis : hoc audito, ira fervens, repente corpus imbecillum ac fere exanime erigit, Ego, inquit, munus illud abnuo, Christus unicus Mediator. Non multo post invisit eum frater natu major. Tu, inquit, cognatum nostrum

increpa, mone alium capessat vitæ tramitem, alioqui nulla ei salus, certissima ruina. Deinceps illi sermo contractus, non diffusus, verba tamen fortia ac efficacia, gaudium cœleste spirantia ac redolentia; sub vitæ finem placidus quidam somnus irrepit, qui cum aliquandiu eum occupavisset, placide ac suaviter Creatori ac Redemptori suo animam commendat. Et quamvis extinctus, notas tamen oris pallor non confundebat, verum temperato quodam rubore perfundebatur. Ejus decessus fama, quantas lachrymas, quot suspiria ac singultus per universam urbem ac regionem concitarit, relatu fere incredibile. Funus majori quam unquam Edinburgi celebritate, quamvis prohibente tempestate, decoratur: Turmatim enim tam sublimis quam plebeïæ sortis homines ad illud oruandum confluerant.

VITÆ ET OBITUS  
D. ROBERTI ROLLOCI, SCOTI,  
NARRATIO,  
AB HENRICO CHARTERISIO,  
CONSCRIPTA.



# NARRATIO VITÆ ET OBITUS

SANCTISSIMI DOCTISSIMIQUE VIRI

**D. ROBERTI ROLLOCI, SCOTI,**

MINISTRI EVANGELII ET RECTORIS

ACADEMIÆ EDINBURGENSIS.

---

**J**AM olim inolevit mos virorum illustrium et virtute aliis præcellentium vitam obitumque describendi, et ad posteritatis memoriam consecrandi. Laudabilis sanè consuetudo, et qua vix alia observatione dignior. Ejus enim maximus publicè usus ad homines ad virtutem, pietatem, bonosque mores excitandos. Mirum quantum exempla rudiores moveant! Nam quod præceptis, etiam ex ipso vivo sacrarum literarum fonte traditis, tota vita discere non possunt, proborum virorum exemplo et imitatione facile assequuntur: præsertim si noti sint, si eorum facta et mores oculis obversentur, si palam fiat eorum tota conversatio. Quo magis moveor ut piæ memoriæ ROBERTI ROLLOCI vitam moresque paucis describam (cujus non doctrinam tantum, sed et sanctimoniam vitæque integritatem ipsi etiam qui supersunt et una cum eo vixerunt veritatis hostes inficiari non

possunt) ut et plerique qui adhuc vivunt meminerint quæ bona ex eo didicerint, et posterì exemplar habeant sibi propositum quod imitentur.

ROBERTUS ROLLOCUS, natus anno 1555, patre DAVIDE ROLLOCO, Puissæ (quæ villa non longè Sterlino abest) comarcho, matre MARIA LEVINGSTONIA ex illustri Levingstoniorum familia oriunda. Singulari patris cura et studio liberaliter educatus, etiam in ipsa pueritia cum prima elementa addisceret, non obscurum magni ingenii specimen dedit; quo motus pater eum Sterlinum ad humaniora studia capessenda amandavit. Hic præceptorem habuit THOMAM BUCHANANUM (magno illius Buchanani poetarum sui sæculi facilè principis ex fratre nepotem) spectatæ tum probitatis, tum eruditionis virum, et egregium juventutis erudiendæ magistrum, sub cuius ferula ita in humanioribus literis profecit ut Buchananus eum impensè dilexerit, et Rollocus vicissim præceptoris amorem ita compensavit, ut multis post annis, cum Academiæ Edinburgenæ præfectura fungeretur, nunquam eum Edinburgum pro re nata venientem passus sit extra domum suam hospitari, eique insignem illum commentarium in priorem ad Thessalonicenses Epistolam in testimonium gratitudinis dicarit. Ubi in studiis humanioribus satis maturuisset misit eum pater Andreapolin ad sublimiora illa philosophiæ



studia ineunda. Ubi Collegium quod Salvatorianum vocant ingressus, eos progressus (Regente Joanne Caro viro eruditissimo) in philosophiæ studiis fecit, ut ex condiscipulis pauci eum assecuti sint, nemo anteierit. Exacto hoc curriculo, etsi omnibus, propter egrégias quæ in eo enitebant dotes, esset charissimus, vicaria tamen opera aliquandiu in docenda philosophiâ functus est, donec vacante loco in numerum professorum philosophiæ allectus est; in qua professione ita cum philosophiæ studiis pietatem animis adolescentum instillavit, ut magnam inde laudem adeptus sit, et cœperit ipsius nomen latius propagari.

Accidit intereà ut Senatus Edinburgensis de erigenda EDINBURGI ACADEMIA cogitare cœperit, idque præcipuè instigatione JACOBI LAUSONII pastoris fidelissimi (cujus eximia eruditio et pietas digna est quæ omnibus sæculis celebretur) et GULIELMI LITILLI viri integerrimi, et propter spectatam prudentiam ac fortitudinem civibus suis charissimi. Cogitatio hæc hinc orta, quod regni Metropolis esset, et animadverteret Senatus cives suos, non tantum gravi molestia, sed magno etiam impendio, liberos Andreapolin, aut ad alias Academias erudiendos ablegare, et quod intelligeret complures tenuioris fortunæ sic angustia rei familiaris premi ut extra domum suam sumptus educandis liberis tolerare nequirent, eoque coactos plerumque sublimia ingenia mechanicis artibus addicere. Ubi

hoc semel Senatus propositum nihil omittit quod ad opus promovendum spectaret ; ædificia tanto operi idonea comparat, quæ deerant à fundamentis extruit, prudenter etiam cavet ut omnia in promptu sint ante ineuntem Octobrem, quo tempore philosophiæ candidati se ad Academias conferre solent.

Omnibus abundè provisus, consultare demùm cœpit de Rectore qui Academiæ præesset. Innotuerat jam multorum relatione Jacobo Lausionio ROLLOCUS noster, qui et ad eum literas miserat humanitatis plenas, quibus eum ad hanc provinciam suscipiendam hortatus erat : his comiter et amicè respondit Rollocus, et, ut erat homo verè aliis instituendis natus, promptum se paratumque ostendit si honesta accederet vocatio. Adit itaque Senatum Lausionius (cujus summa apud eum erat authoritas) edocet nullum magis idoneum cui Academiæ præfectura committatur quam Rollocum, de cujus doctrina et vitæ sanctimonia abundè sibi constaret. Decernitur continuò accersendum Rollocum, et electi in eam rem duo cives primarii, qui Andreapolin contendunt. Ii Rollocum adeunt, rem omnem ei aperiunt, hortantur seriò ne in tam sancto negotio Senatui desit, et faciliè quod volunt persuadent. Veniens Edinburgum Rollocus Senatum alloquitur, faciliè inter eos convenit : præfecturam Academiæ suscipit, quam ita gessit quamdiu vixit ut nihil unquam majori, aut Ecclesiæ emolumento, aut Reipublicæ ornamento cesserit. Calendis Octobris anni

1583, in publico Academiae auditorio luculentam habuit orationem, conflente copiosa cujusque ordinis multitudine, qua egregiam sui in animis hominum admirationem concitavit. Postridè, qui dies indictus erat adolescentibus qui philosophicum cursum statuerant inire ad conveniendum, magna sese offerentium multitudo affuit. Nam ad famam apertae Edinburgi Academiae multi, non ex ipsa tantum urbe, sed ex vicina etiam regione confluerunt adolescentes; quos omnes Rollocus in Latini sermonis puritate addiscenda usque ad diem examini constitutum diligentissimè exercuit. Habito examine plerique qui comperti sunt ad capessendum cursum philosophicum minus idonei curae Duncani Narnii, viri morum elegantia et doctrina singulari, (ut eos exactiùs in literis humanioribus in sequentem annum institueret) commissi sunt. In ipso autem limine cum institutione disciplinam conjunxit, et plerosque laxiori trivialium Scholarum disciplina effraenes adhibita severitate compescuit; severitatem tamen insita quadam sibi elementia prudenter temperavit; et utranque religionis elementis sic miscuit ut guttatim tenellis adolescentium animis pietatem instillaret. Inque eam rem singulis diebus Saturni (cum discipulos à mane ad meridiem usque disputationibus exercisset) à meridie praelegit Quaestiones Bezae in quas etiam brevem analysin ad discipulorum memoriam juvandam edidit; in iis etiam diebus Dominicis ab hora septima matutina ad sesqui-

octavam qua adeunda erat concio, eos continuè exercuit, et à meridie ex quo à pomeridiana concione reditum est (post repetitas quas in templo audierant conciones) rationem exigebat. Deinde Catechesin Palatinatus eorum mentibus diligenter inculcavit, et textus Scripturæ selectos perspicuè interpretatus est, adhibita etiam accurata analysi; qua facillimè mentem Spiritus Sancti assequi possent: nihilque omisit eorum quæ ad Dei cognitionem et timorem adolescentium animis imprimendum facere possint quibus ipsius laboribus felici successu abundè benedixit Deus. Neque tamen hæc tanta in studii pietatis sedulitas quicquam remorata est ordinaria humanitatis aut philosophiæ studia. Nam toto quadriennii curriculo, postquam in Græcæ linguæ cognitione probè eos instituisset, summa cura et solitudine Aristotelis contextum singulis hebdomadæ diebus discipulis prælegit, exorsus ab Organo Logico, Ethica Nichomacheia et Physica percurrit, quibus adjecit etiam Arithmeticæ principia, doctrinam de Anatomia corporis humani, de Sphæra (accuratè exposito textu Joannis De Sacro Bosco), de Geographia, ut mirum videri possit, aut potuisse eum tam multa docere, aut discipulos discere, qui tamen (Deo ipsius laboribus benedicente) ita in singulis hisce profecerunt, ut non minus parati essent de unoquoque rationem reddere quam si ei soli neglectis reliquis incubuissent: Sed in tanta alacritate ac animorum promptitudine quanta tum in adolescentibus fuit quid

non posset labor improbus? Exacto curriculi philosophici quadriennio, post accuratam singulorum examinationem, laurea, quam magistralem vocant, eos donavit, sed prius summa gravitate admonitos officii sui. Monuit eos quanta diligentia et solitudine eorum bono invigilasset, quàm serio semper eorum animos præparasset ad alteram illam vitam ac immortalem, ad quam hortatus erat ut vitæ hujus præsentis ac perituræ omnes cogitationes, omnia studia etiã humaniora, omnes actiones dirigerent: quàm seriò dederit operam ut ejus vitæ sensu aliquo magis magisque indes afficerentur, ut eo quasi gustu futuræ lætitiæ ac gloriæ allecti desiderarent illam plenitudinem gaudiorum, et suspirantes expectarent adoptionem et redemptionem corporis sui. Commendabat quidem iis artes, scientias, exercitationes quascunque quæ sunt etiã hujus vitæ, postulabatque ut quamprimum ingrederentur certum aliquod vitæ genus honestum ac laudabile, in quo vel Ecclesiæ, vel reipublicæ usibus inservirent; sed ita semper ut meminerint admonitionis Paulinæ, ut quia tempus contractum est imposterum uterentur hoc mundo ut non abutentes, qua permisit quidem Paulus procurationem istorum omnium quæ ad præsentem vitam pertinent, sed ita tamen ut intereã dum his exercerentur *πολίτευμα* suum haberent in cœlis, hoc est, dum corpora versantur circa ea, animi intereã in cœlis sint, intuentes Deum, ejus voluntatem et gloriam, et expectantes inde venturum

Dominum et Servatorem Jesum Christum qui transformet corpus nostrum humile ut conforme fiat corpori suo glorioso. Protestatus est detestabile se semper censuisse profanum illud hominum genus et atheos illos qui se potiùs quàm Deum spectarent, quibus omnia hujus vitæ bona tandem in exitium sint cessura. Postremò sermonem suum conclusit cum seria exhortatione ad pietatem, sanctimoniam vitæ, perseverantiam in ea veritate et religionis puritate quam accepissent, et in qua educati essent.

Post emissam primam hanc classem contracto cum Helena Baronia lectissima fœmina connubio, valedixit philosophiæ, et totum se sacrarum literarum studio (ad quod ab ineunte ætate semper animam appulerat) tradidit : et suffecto Philippo Hislopo, adolescente probo et erudito, qui succedentem classem susciperet, Academiæ præfectura contentus fuit, in qua nihil omisit eorum quæ ad ipsius commodum spectarent. Quis hîc non impensam ipsius industriam admiretur ? Consuevit enim frequenter singulas classes adire, cujusque sedulitatem et progressum in studiis explorare ; si quæ contentiones, si quæ turbæ incidissent egregia celeritate ac prudentia componere, universos ad perstandum in officio erigere, quotidie omnibus in auditorium convocatis preces ipse celebrare. Unaquaque hebdomada unius diei delectum fecit, quo discipulis suis omnibus in unum cœuntibus textum aliquem Scripturæ interpretatus est, unde admonitiones, hortationes, commi-

nationes, salutare eruit, non sermonis fuce obductas, verum sententiarum pondere ac gravitate efficaces ad adolescentium animos emolliendos, instituendos et ad sanctimoniam efformandos. Hujus prælectionis tanta fuit efficacia ut ea adolescentium animi arctiùs quam asperiori aliqua disciplina in officio continerentur. Absoluta prælectione scrutari deinde cœpit ex censoribus, quos ad delicta singulorum in suis classibus observanda nominârat, quos ea hebdomada notâssent delinquentes : delatos summa dexteritate increpuit, iram Dei ante oculos proposuit, dedecoris metu attonitos reddidit quibus plus ad penitentiam et vitæ emendationem apud eos profecit quàm si mille plagas inflixisset. Quibus enim aliorum nec verba, nec verbera dolorem afferre, lacrymas excutere quivissent, cœlestem iram intonando, blandis promissis mulcendo, sic eos terruit, concussit, prostravit, ut suspiria, singultus, interdum etiam fletus uberrimos expromeret. Illud autem in eo fuit insigne quod sive promissiones evangelicas proponeret, sive severè judicia minitaretur, ita se interdum etiam nequissimi animo (adversus quem vehementissimè excanduisset) insinuavit ut profusum ejus in se amorem derivaret ; neque tam metu quàm amore ad ultroneum obsequium traduceret. Consuevit etiam singulis hebdomadis, vel ut occasio ferebat, Regentes convocare, ut inter se conferendo consultarent et dispicerent si quid reformatione opus haberet, aut in melius mutari posset : quo factum

ut Academiæ disciplina purior, exactior et magis integra permaneret.

Postquam, emissa classe, et sepositis studiis philosophicis, se ad Theologiam contulisset, dici vix potest quanta sedulitate, quanta vigilantia, quantis laboribus conatus sit eos ipsos adolescentes, quotquot ad rerum divinarum studia animos applicassent, in Theologia instituere, interdum quidem analysin logicam in Epistolas Paulinas aut alios Sacræ Scripturæ libros dictitans, interdum locos communes tractans, interdum controversa cum pontificiis Religionis capita examinans: in quibus studiis ita assiduè versatus est ut nullam diei horam vacuam præterire permetteret. Hanc tam assiduam operam condiebat crebris hortationibus, quibus adolescentes ad sanctioniam et fidelitatem in munere pastorali (ad quod eos præparabat) incitabat. Postulabat imprimis ne crudos se ac immaturos ad munus illud protruderent. Zelum quidem seriò iis commendabat sed prudentia conditum: in nulla re magis quàm in zelo errari, quem alii præcipiti suo affectu, alii ut tum ferebant tempore, inconsulto vesanæ plebis iudicio, metirentur: fovendum quidem in Ecclesia zelum genuinum: esse eum ignem cœlitus descendentem, quem ali in domo Dei operæ pretium sit: explodendum tamen zelum adulterinum, quod ignis sit peregrinus. Obnixè autem serioque suadebat ne res suas privatas prætextu religionis quærerent, neque famam sincerita-



tis alios sugillando, criminando, taxando aucuparentur : hortatus etiam ut nihil opinionis, omnia conscientiae grata agerent. Huic tam indefesso studio et immensis laboribus ita benedixit Deus ut plurimos paucis annis ad munus pastorale propulerit, in quibus sanctimoniae et eruditionis suae viva effigies eluceret.

Ad hos labores tanta industria exantlatos accedebat et alius, quod cum videret in templo, quod Novum vocatur, ingentem summo mane convenire multitudinem populi ; nollet eum, ut solebat, otiosum sedere, sed (tanta hominem alios in via Domini instituendi incessit cupido) singulis diebus Dominiicis hora septima matutina (quod antehac Edinburgi nunquam factitatum) palam concionari cœpit, tanta Spiritus et potentiae demonstratione, tanto sententiarum pondere, tanta verborum gravitate ut plerorumque mentes caelesti luce perfunderet, affectus permoveret, omnes in sui admirationem raperet. Neque enim vulgus tantum movit, sed et eruditum hominum genus sic affectit ut novam lucem in mentibus suis accendi, novos affectus in cordibus formari non obscure sentirent ac profiterentur.

Postquam sic concionando absolvisset Apostoli Pauli Epistolam ad Ephesios, scripsit in eam commentarium qui typis excusus est anno 1590. Eodem ferè tempore in Academia discipulis suis publicè diebus Lunæ prælegit Epistolam ejusdem Apostoli ad Romanos, inque eam edidit analysin logicam, interjecto etiam (occasione aureæ

illius catenæ beneficiorum Dei quæ, cap. 8, vers. 30, habetur) tractatu insigni de nonnullis Christianæ doctrinæ capitibus : Duo hæc scripta cum forte in manus celeberrimi illius Theologi D. Theodori Bezæ incidissent tanto gaudio ejus animum perfuderunt, ut, in Epistola ad Joannem Johnstonum Theologiæ in Academia Andreana professorem, non potuerit se continere quin in ejus laudes erumperet. Visum est aliqua ipsius verba attexere. “ Hoc ipso tempore, (inquit,) mihi contigit Thesaurum nancisci, qui nescio quo sinistro fato, quamvis hic in omnium aliorum conspectu versaretur, me tamen adhuc subterfugerat : Thesaurum enim cur non appellem, et quidem pretiosissimum, illos honorandi summè fratris, D. Rolloci, cum in Epistolam ad Romanos, tum in Epistolam ad Ephesios, utramque inter Apostolicos omnes celebratissimam, commentarios ? Sic enim ego quidem de iis apud me statuo (quod absque ulla specie adulationis dictum velim) nihil adhuc legisse me in hoc interpretationis genere brevius simul, cum elegantius, tum judiciosius scriptum, ut ipse me iis inspectis continere nequiverem, nec etiam, opinor, debuerim, quin et Deo de hoc utilissimo proculdubio quamplurimis futuro labore gratias magnas agerem, et tantum hoc vobis bonum, vel toti potius Ecclesiæ, gratularer, Deum precatus ut hunc hominem novis subinde donis auctum feliciter conservet, hoc præsertim tempore in quo propter tantam operariorum in excolenda Dei nostri vinea raritatem, et pau-

cissimos ex veteranis illis exercitatissimis superstites triumphare jam sibi de oppressa veritate Satan cum suis videbatur.” Hæc Beza.

Edidit postea commentarios complures, ut in Psalmos aliquot selectos, in Daniele prophetam, in Joannem Evangelistam, in nonnullas Epistolas Paulinas; tractatum prætereà egregium de Efficaci Vocatione, et libellum utilissimum de Fœdere Dei et de Sacramentis; qui omnes, non modò in Scotia, sed et apud exteras regiones, non minori Ecclesiæ emolumento, quàm nominis sui ornamento, multorum manibus teruntur.

Roloco his tot tantisque negotiis (quæ hominem totum vel vigilantissimum distingere, et occupatissimum reddere possent) incumbente, imposita est præterea necessitas capessendi ministerii urbani, hac occasione: Erat jam civitas tota, communi tam Ecclesiastici quàm urbani senatus consensu, suadente etiam Roloco, in octo quasi parochias divisa: singulis parochiis præficiendus erat suus pastor, qui ipsius curam haberet. Erant tum in urbe pastores, viri quidem magni nominis, et in officio suo vigilantissimi ac fidelissimi, sed non eo numero qui tot parochiis sufficeret. Itaque in Rollocum omnium oculi conjuncti, eum sibi pastorem expetunt; cum eo seriò agunt vellet ipse ad tam sanctum ac propè necessarium opus divisionis parochiarum promovendum ministerium suscipere, ac parochiæ unius curam gerere. Omnibus enim



summis juxta ac infimis erat gratissimus charissimusque. Gratum charumque reddidit candor quidam in rebus gerendis genunus, insignisque humilitas, quæ reliqua dona quæ in eo erant eximia mirificè exornavit. Quanvis enim ille præclaris dotibus aliis ferè omnibus præluceret, sese tamen suo censu infra omnes demisit. Fixo quidem animi proposito constituerat apud sese latere, utque studiis liberius vacaret intra Academiæ pomœria sese abdere, ne curis publicis implicaretur ; præter votum tamen ad publica negotia pleraque extractus est, quæ quidem ille singulari et sanctissima pariter prudentia expediebat. Præcipiti plebis zelo turbata maturo ejus consilio in ordinem reducta sunt. Rara zeli socia prudentia, nec assiduus prudentiæ comes zelus ; utriusque tamen insignem temperiem Rolloco indiderat is, qui munera tacito dispartit arbitrio, quam, cum Ecclesia, tum Respublica Scoticana cum magno suo bono et comodo sensit sibi salutarem. Novissimo vitæ biennio sic curis publicis prægravabatur ut valetudo alioqui satis infirma labesceret : assiduis enim calculi cruciatibus angebatur, et stomachi infirmitate languescebat, et tamen visum est Deo, hoc ipso summè perplexo tempore, ipsius opera Ecclesiæ pessum eunti subvenire. Nam quantum humano judicio consequi valemus, nisi periclitanti Ecclesiæ celerem opem tulisset, in miseriarum oceanum incidisset. Inconsulto enim armatæ plebis concursu, Regis ac primatum (qui jam Edinburgo

Limnuchum secesserant) ira vehementissimè exarserat, quo factum ut Ecclesia et Respublica in magnum et anceps periculum devolverentur. Squalida tum ac lugubris rerum conditio trucem lacrymabilemque faciem spectantibus præbuerat. Cum in turbis hisce componendis complures operam ac oleum perdidissent eluxit tandem tanquam sidus salutare sanctissima Rolloci prudentia, pietate, modestia, humilitate condita; quæ tantum regii pectoris possedit ut ejus animum in Edinburgenses asperiores ac multorum judicio implacabilem, lenierit, Ecclesiam ex incendio, Rempubicam ex conflagratione eruerit. Sed quamvis Rolloco exinde creverit existimatio, quod turbulenta hæc tempestate Ecclesiæ lugubria detraxerit, et turbata ad pristinum statum reduxerit, res tamen sigillatim ab eo gestas prætereo, ne cogar longiorem illius temporis historiam pertexere, et ab instituto supra quam par esset digredi. Res Rolloci assiduus vigiliis ac indefessis laboribus compositas insecuta est Synodus Taodunensis, quam visum Regi sua præsentia ornare. Synodo præses omnium suffragio Rollocus deligitur. Ibi quæ Synodo Perthi non multo ante habita severiùs in speciem decreta videbantur benigniorem interpretationem sortita sunt. Flagitat Rex vellet Synodus nonnullos designare qui excubias pro Ecclesia agerent, ne quid ea detrimenti caperet. Confestim pedibus itur in hanc sententiam pietate ac prudentia eminentiores quosdam deligendos quibus provincia hæc de-

mandaretur : Ex his Rollocus unus : horum munus temporis spatio et administrationis modo ac ratione circumscriptum est, decretumque ut defuncti muneris rationem proximæ insequenti Synodo redderent. Hi Ecclesiam tumultu, de quo dictum est, miserè quassatam maturis consiliis et perpete industria, reficere, sensimque restaurare adnituntur.

Anno 1598, præcipite hieme vehementius solito morbo ingravescente domi se concluderat. GULIELMUS SCOTUS, summa necessitudine ei conjunctissimus, consulit in domum suam transiret, aerem sereniorem ac liberiozem carperet, ut hac ratione, si fieri posset, valetudinem recuperaret : ille consilio obsequitur, transitque. Initio quidem post migrationem cœpit meliuscule valere, verum confestim geminata morbi vis lecto eum affixit. Ille cum spiritus linquentes, seseque in confinio mortis sensit, cœlesti gaudio perfusus, mellitis et plaué divinis sermonibus omnium qui inviserant animos ingenti lætitia affect ; verum lætitiâ interpellabant abortæ omnibus lacrymæ cum pensarent tantum virum nondum matura ætate præripientum, adimendum Ecclesiæ parentem, Reipublicæ salutare columnen, neminem superesse qui turbas in Ecclesia componat, offenso principi cives reconciliet, Ecclesiam in gratiam cum eo reducat. Ille solita prudentia res domesticas digerit : deinde uxorem post sterilitatem undecim annorum uterum ferentem curæ amicorum, imprimis

Gulielmi Scoti (cujus fidem et benevolentiam erga se eximiam multis jam experimentis didicerat) seriò commendat. Ingressis ad eum PATRICIO GALLOVIDIO et DAVIDE LYNDESIO amorem in principem qui semper ejus animo medullitè insedisset testatus, in eoque se vita excessurum professus, flagitat ipsius nomine regem adeant, hortenturque, ut religionis tramitem quem inoffenso cursu lucusque pressisset, gradu non vacillante ad ultimum vitæ spiritum calcaret, neque spe ulla amplificandi regni, aut veteratorum subdolis technis se ab eo divelli pateretur, de Ecclesiæ pastoribus qua par esset reverentia sentiret et loqueretur. “ Illud enim Christi ministerium, quantumvis humano calculo abjectum et humile, apud Deum tamen esse gloriosum : Pastores licet testacea sint vascula, omnium sordes et purgamenta mundi, illustri tandem gloria fulsuros.” Ingressi deinceps pastores Edinburgeni, quibus assidentibus sic inquit. “ Ægritudinis mole lassus vitæ hujus exitum anhelans spiro ac spero. Non sic Christum didici aut docui quin in eo harum ærunnarum levamentum sentiam. Academiae cura, fratres, altissimè semper animo meo insedit : quanta ego eam fide ac industria administrârim testis est Deus, ego mihi probè conscius sum : quantum ex ea in Ecclesiam et Rempublicam emolumentum redundârit, vos testes. Rumpendum mox vitæ meæ filum, trajiciendumque mihi in patriam diu multumque cupitam : ne quæso me vivis exempto nimis amarè orbi-

tatem suam defeat Academia. Vos, vos, inquam, non novercæ, sed genuinî parentis vices obite, eam vestro sinu alite, fovete. Pastorale munus non ita pridem mihi incubuit, quod quauobrem in me susceperim non vos præterit : In eo egregium quid præstitisse me affirmare non audeo, voluisse tamen audebo. Memoriae vestræ non excidet Synodo Taodunensi delectum me cum aliis quibusdam qui pro Ecclesia excubarem, in quo cum Dei gloriam et Ecclesiæ incolumitatem repentino tumultu miserè quassatam mihi ob oculos habuerim, nullius admissæ culpæ pœnitentia discruciari me profiteor. Susurravit quidam nuperrimè in aurem meam disseminatam rumorem inquietare animum meum ob iniquè et perperam gesta in ista provincia. Deum arcanorum omnium arbitrum ac testem, ad cuius tribunal ego mox sistendus, appello, cùm in omni hoc negotio ad scopum legitimum collimarim, nihil esse quod me cruciet aut angat. Non eo quidem inficias, cùm Ecclesiam ac Rempublicam nexu amabili ac fraterno colligârît prudens mundi opifex, in hoc remis ac velis incubuisse me ut se mutuis juvarent officiis, ne Reipublicæ gladius in Ecclesiæ perniciem stringeretur, aut Ecclesia in principem aut Rempublicam acerbîus inveheretur, bellumque non necessarium excitaretur. Neque tamen aut ita me pacis amor fascinavit ut genuinam ab adulterina non secreverim, aut affectus in principem ita abripuit ut in ejus gratiam labeculam ullam conscientiæ fuerim inducturus :



verum meorum factorum candor etiam me extincto clarescet. Cæterum vos unanimi consensu ad opus Domini coalescite. Quid magis incongruum quam pacis præcones litigio ac discordia dilacerari? hac tempestate, qua in insidiis hostes sunt, non dissidiis dissipandæ vires, verum pace combinandæ sunt: petendum hostium latus, non mutua jugula. Principi vestro debitum obsequium præstate: Rara temporum felicitas vobis obtigit: principem nacti estis qui cum lacte religionem hausit, quæ ejus visceribus recondita cum eo coaluit, religionem disciplina circumvallavit, circumvallatam suo præsidio texit, Ecclesiæque patrocinium sic in se suscepit, ut quamdiu eum vita non deserit illud non deserturum se innumeris documentis palam fecerit. Quod itaque blandè mulcendo ei elicere potestis, ne invito extorquere frustra adnitimini. Seriò cavendum ne ex hoc felicitatis fastigio pessum se det Ecclesia. Poterat Paulus Onesimum fugitivum apud se retinere, noluit tamen absque Philemonis sententia, ne ipsius beneficium ex necessitate esse videretur. Pauli vestigiis sentio insistendum vobis in tanti ponderis negotio. Deus pater Jesu Christi vos omni benedictione spirituali locupletet, et invicto robore muniat ad ministerium illud strenuè obeundum." Vesperascente eodem die properare mors videbatur quam ille olfaciens sermonem occipit, non humano cerebro effectum, sed cælitùs a Dei Spiritu stillantem, qui cunctis astantibus admirationem incussit. Aderant Medici, qui medi-

camentis suis vim morbi lenire (quod vigor naturalis deficeret) renue-  
runt [tentabant]. Ad Deum itaque verso sermone, "Tu, inquit, Deus,  
medeberis mihi :?" Dein preces zelo intentissimo fundit, orans primo  
vellet Deus sibi suisque peccatis propter unicum Christi sacrificium  
propitius esse, prædicans omnia, quantumvis apprimè speciosa, prop-  
ter crucis Christi eminentiam pro stercorebus se ducere : precatus  
deinde vellet vitæ suæ exitum faustum ac felicem indulgere, ut mi-  
sericordiæ alis opertus in Christi sinu excederet, fruereturque Dei  
vultu, quem crebro anhelitu intueri sitiit. "Ego te, inquit, subobscurè  
in verbi speculo vidi ; largire mihi diu multumque optati vultus tui  
sempiternam fruitionem." De resurrectione et vita æterna verba pro-  
fert immortalitatis sensum spirantia. Singulis qui astabant dextra  
prehensis summa verborum comitate ac gravitate benedicit, bene-  
dictionem hortationibus pro cuiusque indole ac munere prudenter  
miscet. Ea nocte præter spem paulùm requievit. Die qui eum inse-  
cutus est urbani magistratus, complures etiam ex ordine senatorio  
eum invisunt, quos juxta lectum accumbentes sic affatur. "Quantum  
præsagiis ullis assequi valeo absolvendum mihi vitæ pensum, depo-  
nendum corruptibile hoc corporis indumentum, transeundum in pa-  
triam : Neque hoc mihi acerbum ; novissimum enim hujus vitæ diem  
crebra siti concupivi. Academia semper anxium me maximè habuit ;  
ego eam jam deserturus, si celarem quem meo calculo sufficiens

mihî, Academiæque præficiendun censeam, incuriæ maculam non effugerem. Quid attinet exterâs regiones pervagari, peregrinum asciscere qui huic provinciæ præsit, quem interim doctrina disciplinaque hujus Academiæ lateat? Domi virum locupletatum donis ac ad munus hoc instructum habetis, HENRICUM CHARTERISIUM, qui eruditionem me præceptore uberrimè hausit, et professoris philosophiæ munere plus decennio egregia cum laude perfunctus est. Hunc vos in Academiæ puppi sistite, ejusque clavo apponite. Deum illi propitium ejusque laboribus benedicentem conspicietis. Vos decet ex officio Academiæ Mæcenates ac patronos esse: Altior, quæso, ejus sollicitudo animos vestros subeat. De domesticis quid dicam? uxorem desero uterum ferentem: unum a vobis summopere contendo; sentiat illa amorem quo semper me amplexi estis extincto me non exaruisse. Nunquam mihi dies aut nox ægritudinis expers: illa me tot morborum difficultatibus quassatum suaviter semper fovit ac refocillavit. Ingenuè profiteor ex omnibus stipendiis meis non coacervasse me obolos duos; nunquam enim mihi cordi aut curæ mundana hæc. Quid multa verba perderem: ne, quæso, affectus vester in me claudicet in eam." Magistratus senatoresque solenni promisso fidem dant facturos se omnia ex animi ipsius sententia. Professores deinde philosophiæ ad perstandum in officio, debitumque successori suo obsequium hortatur. His peractis, verba insigni sanctimonia condita profundit:

“Deo meo, inquit, gratia, memoria, visus, auditus, reliquique sensus mei tam vivaces, tam vegeti quàm alias unquam; ast ab hoc mundo alienatum cor meum, et quorsum Domine Jesu, corde meo non fruereris cui soli in illud jus? In hoc per totam vitam incubui ut illud tibi dicarem ac consecrarem: illud quaeso assume ut tecum commoretur.”

Hæc locutum invadit lenis quidam somnus, ex quo experrectus summo affectu flagrat dissolvi, et esse cum Domino: “Veni, inquit, Domine Jesu, fragilis hujus vitæ filium abrumpe; matura, Domine, ne tarda. Jesus me redemit, non ut caducam hæc, verum æternam vitam indulgerit. Veni, Jesu, largire vitam propter quam redemisti me.”

Astantes flebili planctu vicem suam in ejus obitu deflent: At ille, “Omnes hujus vitæ gradus emensus sum; ad novissimum perveni; cur retrogrederer? Hunc gradum, Domine Jesu, tuo favore feliciter emetiar. Deduc me in eam gloriam, quam per speculum tantùm vidi: utinam apud te diversarer.”

Qui astabant significant diem posterum Sabbathum esse, unde in hæc verba erumpit, “Tuum Sabbathum, Domine, æternum meum Sabbathum inchoet; auspicia summat æternum Sabbathum meum a Sabbatho tuo.”

In mediam fere noctem modicam nactus est quietem, quam confestim morbi vis interrupit, supremamque horam adesse ratus D. WALTERUM BALCANQUELLUM accersit; quem ingressum sic alloquitur: “Quod dintissimè munus pastorale Edinburgi obieris, quodque non recens nostra

amicitia, accersendum te curavi, ut reverentiam, qua semper a cunis Christi ministerium prosecutus sum, testatam facerem. Ego quidem pro modulo doni preces in sinum Dei fudi; tu quaeso pro me precum sacra peragito; ego corde et affectu sequar: interim ne protrahi vitam hanc flagita." Provolutis omnibus qui aderant in genua preces celebrat Balcanquellus. Inter reliqua flagitat vellet Deus tanti viri diuturniorem usuram indulgere, cum Ecclesiae et Reipublicae salus tan-  
topere eum poscant. Rollocus sic orantem interpellat, "Satius, inquit, mihi hujus vitae, unicè in votis habeo vitam caelestem cum Deo in Christo reconditam." Consummatis precibus in verbi praedicatione enomia erumpit: "Verbum, inquit, Dei potentia ad salutem, Dei sapientia, vita; nec ulla ulli absque verbo salus: non est, credite mihi, exigui momenti negotium verbum praedicare: perinde non est ac Platonis Aristotelisque textum interpretari, aut orationem pigmentis ac lenocinio sermonis oblitam recitare: in sanctimonia, humilitate, efficaci spiritus demonstratione situm est verbi praekonium: quanti illud semper fecerim, novit Deus." Dein ad preces revertitur: "Veni, inquit, Domine Jesu, horum oculorum nervos abrumpe, alios mihi largire: cupio dissolvi ac tecum esse: matura venire, Domine Jesu, ne ultra differ; egredere pusilla vita, ut ingrediatur melior illa vita Dei: inserte, Domine Jesu, huic corpori manum tuam, arripe tibi animam istam." Cum aliquandiu mane quievisset silentium tandem hoc sermone abrumpit,

“Veni, Domine, ne morare ; diei noctisque fastidio lassus sum ; veni, Domine Jesu, ut ad te veniam. O dulce faustum ac felix vitæ hujus divortium : veni, Domine, dulcedo mea, emancipato animam hanc ut te marito fruatur.” Tum ex astantibus unus, “Ne esto anxius, accelerat Dominus tuus:” cui ille, “Gratum mihi, inquit, istud nuntium. Utinam die crastino exequias meas duceretis.” Tum alter, “Beata anima tam Domino vicina quàm tua:” Ille verò, “In me nihil est quod non ducam pro stercoribus ut Christum lucrifaciam : Christus unica solatii materia : omnis justitia mea pannus immundus.” Interrogatus nunquid pastoris ullius alloquium flagitaret, respondit, “Non creaturum se iis molestiam quòd ad concionandum se accingerent : Sinite, inquit, me psittaci instar cum Domino meo balbutire.” Certior factus inchoatam concionem ; “Da mihi, inquit, Domine, ea videre quæ in præsentia alii audiunt.” Sabbathi meridie sic eum affatur quidam ; “Per omnem vitam tuam indefessa opera sedulisque laboribus Dei gloriam promovisti :” tum ille, “Mihi unica gloriandi materia misericordia Dei, in Christo Jesu, alia omnia damna duco.” Dein sopor quidam mollis eum invadit, qui in vesperam occupat : quo discusso ingressus ad eum supremi Senatus præses, cui Edinburgi eo anno præfectura obvenerat, eum sic alloquitur : “Academiam curæ Magistratum quibus tu, Domine, præses serio commendavi ; tu etiam eandem in patrociniū tuum suscipe : experiatur, quæso, te parentem ac Mæ-

cenatem. Cum pro excelsa dignitate qua in republica præcellis, et amplissimo munere quo te honoravit Deus, Ecclesiæ opem ferre possis, ne, quæso, eam subtrahe: in ejus præsidium artus ac vires tuas intende, summo conatu in id incumbe, ut salutem consequaris in Christo Jesu: mundana hæc omnia fluxa sunt, moxque flaccescent. Deus te, tuam conjugem, universam familiam benedictionis suæ thesauro cumulet." Eadem illa nocte has voces emisit: "Tranquilla mihi mens in corpore ægro: mortis, peccati et Satanae metu non angor, nullum illis in me imperium: sic tamen morbi pondere premor, ut longè præter spem in hanc horam supersim. Dominus quasi in mortario pistillo ægritudinis me tundit, ut ad regnum suum formet." Octavo Idus Februarii, "Mirum, inquit, videri potest, cum tam acerbè morbo discrucier, tamdiu protrahi vitam meam; verùm per patientiam Domini beneplacitum præstolabor; connivebo, connivebo; agat ille mecum pro libito, non disseram cum eo. Quid est homo ut cum Deo disceptare andeat? Imò si in orcum detruderet, parendum, non responsandum. Gratiam fac mihi, Domine, propter Christum Jesum. Non erubesco confiteri nunquam me tam sublime notitiæ Dei fastigium attigisse quàm hoc morbo. O quam horrendum in manus Domini incidere! sed reposita est mihi misericordia in Christo. Quid contristaris, anima mea? Quid te dejicis in me? Obveniet tibi mox aspectus et congressus amœnissimus." Cum advesperasceret,

“ Experior, inquit, sexti psalmi veritatem; ac aliqua ejus verba recitat : Gratiam fac mihi, Jehova, quia languore pressus sum : cura me, Jehova, quia conturbata sunt ossa mea,” etc. Interjecta modica pausa sermonem iterat : “ Christus portabit jugum meum, et ego ejus gratia fultus sequar.” Cum morbi acerbitate torqueri eum animadverterent astantes, lacrymas, planctus ac singultus cient ; quos ille increpat ; “ Ne meam vicem, inquit, sed peccata vestra deflete : cùm nemo a peccato immunis nemini fletus materia subtracta est. Quòd ad me, ego omnium complementum ac consummationem mox videbo.” Vesperè ex cognatis unus ad eum ingressus sermone impio bilem ei movit ; ab eo flagitat vellet in cælos receptus mediari pro se reliquisque amicis : Hoc audito ira fervens repentè corpus imbecillum ac ferè exanime erigit : “ Ego, inquit, munus illud abnuo, Christus unicus Mediator.” Non multo post invisit eum frater natu major, “ Tu, inquit, cognatum nostrum increpa, mone alium capessat vitæ tramitem ; alioqui nulla ei salus, certissimum exitium.” Ab hoc tempore oblatum alimentum respuit ; “ Non, inquit, edam aut bibam usque dum in regnum cælorum transferar.” Funeris curam Gulielmo Litallo et Gulielmo Scoto amicis integerrimis (quorum amicitiam non vacillantem frequenti elogio ornavit) commendat. “ Cur non, inquit, mihi esset hujus corporis cura ? illud siquidem glorificandum, et conformandum tandem glorioso Christi corpori :” et manus intu-



ens; "Istæ etiam manus, inquit, illustri gloria fulgebunt." Exinde sermo ei submissior et contractior, verba tamen fortia ac efficacia, gaudium cœleste spirantia ac redolentia, quæ placidus somnus excepit, qui cum aliquandiu eum occupavisset, placidè ac suaviter Creatori ac Redemptori suo animam commendat. Et quamvis extinctus, notas tamen oris pallor non confundebat, verùm temperato quodam rubore perfundebatur. Obiit sexto Idus Februarii 1598, veteri calculo (qui tum in usu) expleto jam ætatis suæ Anno 43. Erat statura mediocri, colore rubido cui candor quidam admistus, coma subrufa, vultu ad comitatem gravitatemque pariter facto; valetudine parum firma, quam mirum erat ad tantos labores sufficere potuisse, singulari pietate, sanctimonia, vitæ innocentia, quam vel inviti admirabantur et laudabant ipsi veritatis hostes. In vocatione sua fidelissimus et vigilantissimus, assiduus in studiis et meditationibus, ab otio suprâ quàm facilè credas abhorrens: fidem tamen facere possunt tot tam paucis annis (etiam corpore morbis et ægritudinibus debilitato) editi ab eo docti et elegantes commentarii. Pacis amantissimus, injuriarum patientissimus, ad condonandum facillimus. In ferenda de aliorum vita dictis factisve sententia perquam æquus ac moderatus: Secus ab aliis prolata præstitave semper (quoad fieri potuit) in meliorem partem interpretatus est. In communi consuetudine et amicorum consortio apprinnè humanus ac jucundus, in con-

siliis fidus, in colloquio affabilis et comis. In rebus seriis gravis ac prudens (quod in publicis Ecclesiae negotiis procurandis omnibus fecit manifestum) in consilio aliis impertiendo promptissimus. Has vero eximias virtutes ornabat admirabilis humilitas, qua quamvis plurimis praestantissimis dotibus alios ferè omnes anteiret, tamen ne infimum quidem fastidiosè despexit, quin potius sese omnibus submitit. Ad humilitatem accessit incredibilis modestia et animi moderatio, ut quamvis multorum convitiis ac calumniis publicè ipso audiente immerito impeteretur, nunquam auditus sit convitia regerere, aut calumniatores recriminari, aut vocem aliquam contra detractores emittere, sed bonae conscientiae testimonio fretus tacitum sese continuit. Semel tantum pro concione apologia usus est, tanta moderatione, ut neminem vellicaret, nullius famae detraheret, neminem insimularet, nemini crimen impingeret, sed sinceritatem tantum suam coram Deo et ipsius Ecclesia testatus sit. Studia sua cum familiaribus communicabat eamque discendi viam saepè utilem sibi ac fructuosam testatus est. Sed cesso de eo plura, quae satis multa dici poterant, et fortasse debuerant: sed omnibus in propatulo sunt ejus virtutes, et tam modesto genio sobrium laudis decus competit. Ejus decessus fama quantas lacrymas, quae suspiria, quos singultus, per universam urbem ac regionem concitavit relatu ferè incredibile. Senatus, Academia, civitas, plebes, singuli tanquam in domestico luctu

ma-rebant, funus majori quàm aliàs consuetum Edinburgi celebritate decoratur. Turmatim enim omnes, tam supremæ quàm infimæ sortis homines, et quidem omnis sexus, omnis ætatis ad illud orandum confluxerunt.



IN OBITUM  
D. ROBERTI ROLLOCI,  
VIRI UNDEQUAQUE DOCTISSIMI SUMMI THEOLOGI,  
VITÆ INTEGERRIMÆ, JUDICII ADMIRABILIS,  
LABORIS INDEFESSI,  
EDINBURGENÆ ACADEMIÆ DOCTORIS PRIMARIJ,  
ET ECCLESIE CHRISTI PASTORIS VIGILANTISSIMI,  
EPITAPHIA.

SICCINE materiam  
Tristis repenti nauis  
Ferreæ Melpomene  
Obtrudis invito mihi ?  
Siccine præripitur  
Ætatis ante terminum  
Gloria magna suæ  
Rollocus ille patriæ ?  
Siccine conticuit  
Vox illa pridem præpotens  
Corda eiere piis  
Addicta concionibus ?

Siccine succubuit  
     Sacri satellitum gregis  
 Sedulus ille labor  
     Tot egerens examina?  
 Siccine vena perit  
     Nunc illa sacros codices  
 Dedita dulciloquis  
     Lustrare commentariis?  
 Scotia moesta dole,  
     Planetus, Edinburge, excita.  
 Gymnasii cecidit  
     Rector, decorque ingens tui.  
 Talia tam properè  
     Prærepta nobis lumina  
 Quid nisi celsitoni  
     Minantur iram numinis?  
 Ille quidem lachrymis  
     Remotus inter cœlites  
 Degit : at assiduas  
     Nobis reliquit lachrymas.

ROBERTUS PONTANUS.

DE me, deque meo meruit tua fratre voluntas,  
     De te verum index ut moriente loquar.  
 Nobiscum hunc orbem donec Rolloce tenebas,  
     Mortales inter Numinis instar eras.  
 Morte (quod optabas) idem nunc additus astris,  
     Implebis merita laude superstes humum.

M. A. RUTHVENUS.

Nox ibi mens animi est, ubi nos animatque movetque ;  
 Est ubi amat : gravibus vox bene uqta viris.  
 Vir præstans animi, et gemino succensus amore :  
 Dilexitque Deum, demeruitque gregem.  
 Ut vivus cæli coluit suprema Rolocus,  
 Sic nunc in superis, sic ut avebat, erit :  
 Ut vivus docuit lingua prudente Rolocus,  
 Sic nunc doctrinæ perpetuabit opus.  
 Neque ibi mens animi est, ubi vis ardebat amoris ;  
 In Christi arcano Christiadumque sinu.  
 Ergo Rolocæ vale, et quem mentis amoribus altæ  
 Semper anhælasti, jam fruire usque Deo.

HAD. DAMMAN à BISTERVELT.

ROLLOCUM extinctum quàm primùm viderat, exul  
 Exule Religio cum pietate abiit.  
 Multa gemeus Sophia, et vestes sine lege coereens.  
 Se trepidæ sociam junxit utriusque fugæ.  
 Rolloco terras cælo mutante, fuerunt  
 Ut comites vitæ, sic abiere viæ.  
 Ante tamen lachrymas fudere in funere mœstas,  
 Et tumulo seetas imposuere eomas.  
 Nec jam, si verum profitebimur, hospita sedes,  
 Numinibus tantis ulla relieta manet.  
 Scilicet his nostris in erimina euntibus annis,  
 Qui rapidum cursum sisteret unus erat.  
 Non vitam livor, moresve calumnia rodit,  
 Quo dentem intendant non habuere locum.  
 Quid sapere, et quid sit benè vivere, discite stulti :  
 Quàm pia vita fuit, mors pia testis erit.

M. THO. CRAGIUS.

VITA gravis, saneti mores, vis aetheris alti  
 Corda replens, alios in sua jura trahit.  
 Candida simplicitas, in aperto pectore virtus  
 Innoeua, ingenuo fama labore cluet.  
 Talis erat, major venienti surget ab aëvo:  
 Morsque viro frustrà est injicere ausa manum.

JO. JOHNSTONUS.

ΡΟΛΛΙΚΟΝ δεινησιν ἀτασθαλίησι λύθεντα,  
 Σώματος ἢδ' ἄινος ἔυδυς ἄφεντα πόνους  
 Οὐλύμπωνδ' ἀναεαυτα Θεῶ εὐολησις ἄνωγει  
 Αἶεν τῷ Χριστῷ συμβασιλευόμεναι.  
 Ἀἴτρα γαρ' ἀφλησαν βαινειν ἐπι δόσθεατα, πίσις.  
 Εὐσέβειη, κόσμος, παντοδαπαίτ', ἀρεταί.  
 Καὶ προτερον γ' ἵκειν εἰς ἔρανον ἔπερπ' ἀληθῆς  
 Ἀλλης παιδείσανδ' ἄγνα κελευδα πατῆιν.

HENRICUS CHARTERISIUS.

ALIUD.

DUM vitam ambiret, toto vivebat in orbe  
 Rolloeus, solis qua micat igne globus.  
 Vidit et ingemuit, non hæc mea vita, nec orbis  
 Jure, inquit, eivem me ferat esse suum.  
 Vita mihi est Christus, cælum est mea patria, cunetæ  
 Res mundi mihi sunt stercora, damna, nihil.  
 Audiit hos gemitus summa qui spectat ab arce:  
 Ergo veni in patriam, mox ait, ergo veni.  
 Jam jam adeunda tibi est fulgentis regia cæli;  
 Ut vita optata sic potiaris ovans.



## ALIUD.

QUÆRIS viator tumultus iste quem tegat?  
 Nemo referre posset hoc plenè tibi.  
 Audire verbo si tamen verum cupis?  
 Operta virtus omnis hoc eippo jacet.

HENRICUS CHARTERISIUS.

IN ROLLOCI PRÆCEPTORIS OBSERVANDISSIMI OBITUM, ATTONITÆ  
 MENTIS INCONDITA PRIMUMQUE ERUMPENTIA ΠΑΘῆ.

AH! quid agis, mi anime, an mœres? mea lumina fletin?  
 Cur? obiit Rollocus meus; immò abiit.  
 At quò abiit? quò me toties raptavit: An ergo  
 Grataris tu illi, an fles tua daurna, modò?  
 Heu ubi amor? fateor lætandum, at torta trahit me  
 Huc natura; trahet me usquequa, et usque gemam.  
 Suspirabo animæ extremum ad suspirium, idem te  
 Dum mihi, vel tibi me quod rapuit, referat.  
 Ergo ades, adsis, inquam, huc ocyùs, arripe filum  
 Atrope; quid moror ultrà? Ut trahat ille viden?  
 Te mi amor, et mea lux, sequor, assequor. Accine laudes  
 Qui potes, et moeror cui superabilis est.  
 Nam me delirare vides, atque obrui; et hic se  
 Nec fletu oruari, nec sua funera, vult.  
 Quin frustrà sumus; ergo sile, nam quis satis illum  
 Æquet dicendo, et Christus id ipsus aget  
 Luce sua illustri: intereà monumenta tot auctum  
 Semper laude nova, et posthumo honore, dabunt.  
 Reptantem sed humi ista decent, nandi inscium ut utres:  
 Tu, hic etiam usque choro cœlituum intereras.  
*Eadem accepti nunciū tristissimi nocte raptim,  
 et velut in procinctu sine arte profusa.*

ROBERTUS BODIUS.

---

FLEANT parentum si orba mortem pignora :  
 Turba ducem ademptum castra si sequentium :  
 Si fata frater fratris amissi gemat :  
 Justi doloris hæc dies quantam attulit  
 Laeymosa causam ? quæ virum tantum abstulit,  
 Virum jubar Britanniae, et patriæ decus ;  
 Cui nulla similem, nec secundum ætas dabit.  
 Laeymosa Patriæ, Ecclesiae, Urbi, Academiae :  
 Qua sustulit fratrem, patrem, et piûm ducem,  
 Ecclesiae, huic Urbi, Patriæ, et Academiae.  
 Hoc ergo tumuli fossilis sub aggere  
 Ecclesia, Patria, Urbs fleat, et Academia.

GULIELMUS CRAGIUS.

---

SPLENDEBAS nitido totum fulgore per orbem,  
 Et tuus Edinum, Scotia, splendor erat.  
 Edini splendor Sophiæ pia dogmata clara :  
 Rollocus sophiæ dogmata clara dedit.  
 Scotia et Edinum precibus pete, clarus, adempto  
 Rolloco splendor ne tuus intereat.

ALIUD.

Hic jacet extinetus, genuit cui Scotia nunquam  
 Doctrina atque animi simplicitate parem.  
 Cujus ab ore sacro Sophiæ seatuere perennis  
 Flumina : spirabat vitæque morsque Deum.  
 Quis memoret plusquam mortalia munera mentis ?  
 Quo fingi cælo splendida facta queant ?  
 Hinc reliquum, effigies poterit quæ nulla referre,  
 Clara Timantæis pingere facta notis.

## ALIUD.

QUI patriam patri offenso patriæque parentem  
Reddidit, est patriæ redditus ipsæ suæ.

JOHANNES ADAMSONUS.

---

QUAM spe præcepit, votis ambivit, amore  
Arsit, habet patriam dia propago suam.  
Scilicet exilii illecebras qui sprevit et odit  
Tantum hilaris mentis dexteritate novæ,  
Jure tot ereptus, quot habet mala vita, procellis :  
Hinc abit, et patria sidus in arce micat.  
O Dolor, ô desiderium, ô lugubria fata !  
Quantum agit in miseros ira tremenda Deûm,  
Pergat et in prædam si vindice numine tollat  
Orbi oculos, populum quanta ruina manet ?  
Legatos revocant jam quid, nisi cogitat arma,  
Stringat in hostiles quæ gravis, ira manus ?  
Hinc Deus avertat, per vulnera sacra, sinistrum  
Omen, et in populo regnet ametque suo.  
Vos quibus incumbit tanti metus inde furoris.  
Exoraturas tollite in astra manus.

DAVID BERCLAUS.

---

QUAM rarum hæc Libitina tegat, quæis dotibus auctum.  
Gymnasium. Patria, Ecclesia sero sciunt.

## ALIUD.

TURBIDA sollicitæ pertæsus tempora vitæ  
In patriam, Rolloce, meas; ubi suavis ovanti  
Se præbet Christi facies, propiorque micantem  
Irradiat longum sperato lumine, manes

Temperie æterna sanctos splendore coruscaus.  
 Heu tamen ad miseros quantam transmittis amicos  
 Moestitiam, Hyblææ viduatos nectare, linguæ.  
 Et quibus indomitæ discordis semina turbæ  
 Componenda. Tuis Academia fulta lacertis  
 Illachrumat gemebunda suo te orbata parente.  
 Sed non extinctus terrenæ hoc funere massæ :  
 Quippe pia ingenii monumenta, et fama laboris  
 Enthea; qua patulum sese diffundit in orbem  
 Religio, celebrata vigent: tua posthuma proles  
 Clarabit memorem memorati patris honorem.  
 Tuque din optati satiatus numinis haustu.  
 Æternum placida compostus pace quiescis.

*Præceptoris manibus moesta  
 parentavit Discip. JOH. RAJUS.*

---

INSUETA obduxit vultum caligine Phæbo  
 Cynthia. Venturæ præscia noctis erat.  
 Bissenis vicibus vix rursum Cynthia fratri est  
 Juncta, Caledoniæ cum alter ocellus obit.

GEORGIUS GREIRIUS.

---

IS Rollocus erat, quales plerique videri  
 Optant, sicque mori, vixit ut ille, volunt.

GULIELMUS ARTHURUS.

---

TE, Rolloce, extincto, urbs moesta Academia moesta est,  
 Et tota exequiis Scotia moesta tuis.  
 Uno in te nobis dederat Deus omnia, in uuo  
 Te, Deus eripuit omnia quæ dederat.

THO. BELLENDENUS.

D. ROBERTI ROLLOCI.

---

SECLA priora una viderunt luce eadentem  
Solem unum, binos hæc videt una dies.

JO. SCOTUS.

---

TRISTE solum haud miror si tu, Rolloce, relinquis  
Et fortunato stes super astra loco.  
Scilicet humanum genus illis vivere par est  
Sedibus ; his magnos convenit esse Deos.  
Moesta tamen patria est, et te sibi plangit ademptum ;  
Et princeps eujus sub ditione manet.  
Moesta gemit conjunx tanto viduata marito :  
Et populus moestum prædicat ore diem.  
Aspice quàm, nutrita tuo tibi lacte juvenus  
Moesta sedet, cupiens te moriente mori.  
Et patria, et conjunx, pubes, Respublica, Princeps,  
Omnia in hoc uno sunt miseranda viro.

ALIUD.

Sis major vita, Rolloce, an morte requiro :  
Cum superet cunctos vitæque, morsque tua.  
Sprevisti vitam, vicisti mortem : erit unde  
Hoste triumphato laurea sarta feras.  
Cœlicus in terris vixisti, mortuus idem,  
Inter cœlicolas cœlicæ regna tenes.  
Vita tamen quàm mors major : Namque illa beatè  
Aetæ dedit placidè sic potuisse mori.  
Regna sibi Reges habeant, diademata, fasces :  
Dum tecum liceat vivere, sive mori.

NATHANAEL VDVARTVS.

SYDERA, cum superum applausu, novus incola scandit

Rollocus, et fati lege Minister obit.

Hunc labor, ingenium, probitas, vigilantia, charum

Fecere in vita civibus esse suis.

Post mortem, pietas docuit transmittere nubes.

Sincerae hos fructus Relligionis habet.

Sparge igitur flores, et fletu parce viator :

Cui Deus hos artus abstulit, astra dedit.

G. DUGLASSIUS.

DEUM vires ostentat, et in terrestria vastum.

Terrorem vult mors ingerere atra sui :

Rollocum invadit vite mortisque magistrum ;

Et pia lugubri sub pede colla premit.

Nil agis, ô truculenta : parvis pro funere vitam :

Non moritur quem mors ad meliora rapit.

ALIUD.

DELICIAE humani generis, Rollocus, imago

Maxima mansueti, quam docet ipse. Dei.

Quem doctum mirantur, amant mitemque, bonumque

Cum populo proceres, Rexque Patresque pio,

Ante diem primo cadit immaturus in ævo :

Frustratus patriæ vota que spesque suæ.

Heu, quis non timeat mortem tetricamque, trucemque

Parcere si doctis, si negat illa bonis.

At quis nunc timeat mortem, vel sæva minantem ?

Perdere si doctos, si nequit illa bonos.

EJUSDEM DE EODEM, QUI CUM AD EUM DIEM LIBERIS  
CARUISSET, UXOREM RELIQUIT PUERPERAM.

TOT tibi qui genuit natos, Ecclesia, natum  
Vix unum moriens liquerat ille sibi.  
Par fuit æternum sterili sobolescere morte,  
Qui vixit Phoenix; jam parit et moritur.

DAVID HUMIUS *posuit*

QUI vita docuit Christum, qui dogmate Christum,  
Rollocus vera simplicitate, fide.  
Post tenebras furvas, quas verbi sole fugârat,  
Nunc clarum in claro lumine lumen habet.

ALIUD.

DUM suavitate vitæ, et innocentia,  
Candore pectoris, morum, et industria :  
Dum sedulis laboribus, et illustribus  
Scriptis suis, et exteros Christum docet  
Rollocus, et cunctis viam ad cælum struit :  
Dum principem et populum, viros et feminas,  
Jvenes, senes, muleet, docet, ducit, trahit :  
Tantis laboribus imparem, mortalibus  
Tantum virum spernentibus, Christus rapit.  
O te beatum ! heu nos miserimos ! eheu.

ALEXANDER HUMIUS.

QUODCUNQUE terræ pergit ad orbitam  
Vinclis ligandum se dat aheneis  
Contagionis, non retrorsum  
Ire queat superos ad orbes :

Quibus solutum lumine perpetim  
 Motuque solis, mox petet infimum  
     Lunam polorum ; quippe crassæ  
     Deposita gravitate terræ.  
 Rollocus hujus Dædalii soli  
 Divinus hospes, se quoque terrei  
     Velitque, nolitque imbuendum  
     Spureitie dederat theatri :  
 Non ceu profanum vulgus, et impiè  
 Contaminantes Justitiæ vias :  
     Qui sæpè sacras functiones  
     Flagitiis maculant pudendis !  
 Verùm potenti lumine Spiritus  
 Motuque sancti, purior indies  
     Euasit, attraetu supremo  
     Donec iter peragit reclusum.  
 Lumen probabunt pneumatis illius,  
 Qui multa sanetè scripsit opuscula :  
     Motusque cuivis emicabit  
     Integritas cui nota vite est.  
 Quare recoctus lumine Spiritus  
 Motuque sancti, de Jehovahæ throno  
     Potentiori defluentis  
     Sidereos superavit axes :  
 Ipsisque cœlis intimus intimis  
 Visit beatos cœlicolas ; ubi  
     Contagio humano remotus  
     Liber aget placidam quietem.

## ALIUD.

CUR ergo functi funera defleam ?  
 Aut tristiori carmine provocem,



Qui quicquid intendit fideles  
 Exhilaret recreetque mentes?  
 Omnem relêgat sollicitudinem  
 Cum Christiana prole beaverit  
 Omnem angulum tenebrosæ  
 Gentis, opes animi refundens.  
 Omnem relêgat sollicitudinem  
 Rollocus, ingens gloria Scotiæ,  
 Qui luce cassus iniquita  
 .Ethereas meditatur arces.

GULIELMUS HARTIUS.

Vatum sonoræ munere barbiti  
 .Equæva mundo nomina sunt virûm  
 Quicumque bigis, aut celete, aut  
 Pancratio meruere pinum,  
 Laurumve Phocbi; vel Jovis æsculum  
 Vani laboris munera frondea  
 Virore jam grato superba,  
 Jam viridî spoliata honore.  
 Quanto Camœnis aptior aureis,  
 Quanto perenni carmine Pindari  
 Tu dignior, Rolloce, docto  
 Materies modulanda plectro?  
 Tu qui ferocis nec fodiens equi  
 Arinos, citato aut curriculo insideus,  
 Nec lubrica famam palestra  
 Quæsieris, pede nec fugace:  
 Sed sempiternam qui tibi gloriam,  
 Vitæ coronam quique paraveris

Vera fide, spe, charitate  
 Nil Satanae insidias moratus  
 Tu blandientis nec facie illice,  
 Sed nec minantis tu facie truce  
 Mutatus, elusisse doctus  
 Quas strueret veterator artes.  
 Ignita quin tu spicula tempseras  
 Orei veneno pestifero illita,  
 Plutonis amentata dextra  
 Quòd fidei tegerere seuto.  
 Bella intulerunt imperia aeris,  
 Tenebricosi turbaque saeculi  
 Rectrix tibi : tu praelio hostes  
 Et superos superâsti et imos.  
 Bellum inferebant scilicet invidi ;  
 Ut te beato à tramite flecterent :  
 Ne quam coronam aeternitatis  
 Perdiderant, fruereris olim.  
 Nequiequam. In altos insereris choros :  
 Semper tueris conspicuum Jovæ  
 Vultum serenum, vultum amandum  
 Gaudia habens potiora votis.  
 Livore major jam frueris polo :  
 Æterna eingit tempora gloria.  
 Quernæ coronæ, laureæque  
 Ludibriumpoli ab axe ride.  
 Quis ludo inani comparet Isthmico  
 Certamen anceps, serium et arduum  
 Tuum ? quis aeternam coronam  
 Pino, apio, tremulisque baccis ?  
 Te, pensa templo sidereo Jovæ  
 Tabella partæ conscia gloria

Victoriæ custos tuæque,  
 Per memores titulos perennat.  
 At te per orbem nos celebrabimus  
 Terræ, canemus pro modulo ingenii;  
 (Sublimis hæc, utcunq̄ue nostram  
 Materies superet Minervam.)  
 Non laude fias ut eumulator  
 Nostræ Camœnæ munere; sed tuo  
 Hortemur exemplo ut minores  
 Vitæ ad iter melioris arctum.  
 Vestigiorumque assiduè ut premant  
 Callem tuorum, ut quæ loca possides,  
 Laboribus defuncti et illi  
 Possideant, requie æviterna.

## ALIUD.

Si Nauta nocte lurida  
 Polum ducem desiderans  
 Moeret quòd erret nescius  
 Obscura quòd nox deferat;  
 Quòd horreat latentia  
 Vel saxa, cæca vel vada,  
 Vel vorticoso gurgite  
 Ne absorbeat̄ur protinus.  
 Tironibus Rollocus est  
 Æquè gemendus omnibus,  
 Quorum mari in scholastico  
 Direxerat cursum modò.  
 Quot è profundo gurgite  
 Sophisticorum dogmatum

## EPITAPHIA.

Ad veritatis littora  
 Enavigare instruxerat ?  
 At hic id est discriminis,  
 Quod nocte sidus hac latens  
 Idem sequente, purus est  
 Si Jupiter, renascitur.  
 Rollocus, heu ! sed occidit,  
 Nec orbis ante terminum  
 Redibit, ejus amplius  
 Cum luce non egebimus.  
 Nunc jure Scoti dicimur  
 Densis tenebris obruti ;  
 Hoc destituti sidere  
 Quod nos beabat lumine.

## ALIUD.

ROLLOCUS ille vixit heu !  
 Qui diffluebat rivulis  
 Lactis perennis, ceu parens  
 Ad irrigandos liberos.  
 Vixit ! fleant alumnuli  
 Cassi pio hoc nutricio ;  
 Et imbre fletum rigent  
 Scholam sua incunabula.  
 Pro lacte, melle, nectare,  
 Quod ore ab ejus hauserint  
 Nunc rore salso, et lachrymis  
 Ejus parentent manibus.

## ALIUD.

OCCIDUNT stellæ ut veniente Phœbo,  
 Et diem adesse docent.  
 Occidens stella hæc monet, et supremum  
 Non procul esse diem.  
 Solis adventum monet et propinquum  
 Justitiæ, imo dei.

GEORGIUS THOMSONUS.

IN teuebris postquam præluxit Jova Britannis,  
 Multa Caledoniis fulserunt lumina Scotis;  
 Qui candore animi, divina voce ministri,  
 Et face præcipua vitæ integritate misellis  
 Excussere animis cæcæ caliginis umbras.

Sed tamen occiduis nuper diffulsit in oris  
 Rollocus vitæ vel prima lucerna beatæ.  
 Prætereà eloquio vir præstantissimus omni,  
 Divino in primis, ejus vitamque, fidemque  
 Nec mens complecti poterit, nec lingua profari,  
 Nuper et indomitæ mortis se condidit umbrâ.

O rerum instabiles casus, et tempora vitæ!  
 Hoc decus ereptum plangunt Heliconis alumni:  
 Hunc solem invisum deflent pia corda piorum, et  
 Scotia lugubri testatur veste dolorem.  
 Defuneti hanc animam quo carmine compellabo?  
 Si modò quid pullæ vestes, et inania possent  
 Munera, nec pullæ vestes, nec munera dêssent.  
 Sed quid ego invideam melioris commoda vitæ?

## EPITAPHIA

Ille suis votis in vita, et morte potitur.

Psal. 27, 4. Davidicum in terris votum, Rolloce, petisti,

Davidico in terris voto es, Rolloce potitus.

Nunc frueris voti fructu, Rolloce, valet.

JOAN. DOUGLASSIUS.

HEU cadis in summo tumulandus lumine vitæ

Et decus, et patriæ gloria rara tuæ :

Flendus abis, Rolloce, tuis, lachrymisque tuorum

Materiem præbes, Uraniaque tuæ.

Te pietasque fidesque gemunt, Rolloce, sepultum ;

Astræa ad tumulum stat gemebunda tuum.

Non tamen Uranie, pietasve, fidesve, tuive,

Tamue Astræa solo quod rapiare dolent,

Quàm gaudent omnes liber quòd pondere terræ

Æterna felix pace fruarè polo.

## ALIUD.

O TE felicem, quem non mortalia tantum

Corda, sed extinctum Numina summa dolent :

Verum præcipue Phœbus, doctæque sorores,

Quæ meritas curant fuoceris exequias.

Hoc solamen habes, verè post fata beatus,

Parca cui totum vivere non rapuit.

Rolloce, æternum vives, meliore superstes

Parte tui, et Musis cognitis usque tuis.

Spiritus ille tuus cœli gaudebit honore,

Virtutesque tuas fama loquetur amus.

JACOBUS COLDINUS.

---

MATERIES fœcunda segesque uberrima laudis  
 Me laudare jubent, simplicitasque vetat.  
 Si taceam laudes, ingrati stigmatè inurar,  
 Hostis si pangam, simplicitatis ero.  
 Impetor hic duplici telo, sed utrumque repellam ;  
 Si pateat saltem simplicitatis honos.  
 Vicit enim multos perniox et perditus, illa  
 Ingenii linquens pignora chara sui.  
 Quod meritas tempserit laudes, se sprevit, et omni  
 Gloriola spreta gloria rara sua est.  
 Hinc, Rolloce, duplex pennis victoria circum  
 Plaudit, et hinc lauro duplicè fulget apex.  
 Hac igitur palma duplici, Rolloce, potitus ;  
 Ardua cœlicolùm limina scandis ovans.

ADAMUS ABRENETHIUS.

---

IN ROBERTI ROLLOCI FUNERE

ECCLESIA LESSUM FACIT.

EXCESSUS, Rolloce, tuus me tristia cogit  
 Murmura in extrema fundere canitie ;  
 Et renovat luctusque graves, et funera acerba  
 Rolli, Arbuthnoti, Smetoniique patrum.  
 Hayorumque Andreiæ obitus, et fata Georgi :  
 Fataque in eduro Lousonii exilio.  
 Obductasque cicatrices, et vulnera eruda,  
 Ultima quæ telis plurima facta meis.  
 Verum cui querar ægra ? an qui mihi vulnera fecit  
 Solus Achillæo tollere more potest.

## ALIUD.

UNANIMES inter quanta ô concordia fratres  
 Cur nec ut antè fuit nunc quoque firma manet ?  
 Excessit Rollocus amici nodus amoris,  
 Rollocus, ruptæ nexus amicitia; ;  
 Isthmi instar bimarîs geminum qui distinet aestum,  
 Hinc atque hinc ne in se mistus uterque ruat.

## ALIUD IN ROLLOCI MORTEM NIMIS PROPERAM.

DUX, Rolloce, gregis tener tenelli,  
 Doctarum deens elegantiarum,  
 Et morum specimen modestiorum.  
 DUX, Rolloce, gregis sacer sacrati,  
 Sal terræ sine fraude, solque mundi,  
 Et vitæ speculum laboriosæ ;  
 Quo diversus abis ? tuos relinquis ?  
 Præsens ? aune abiens tuos relinquis ?  
 Absque et spe reditus tuos relinquis ?  
 Invidit tibi nemo sanis unquam  
 Aut cari emeritum gregis favorem ;  
 Aut e lariaureolum gregis decorem,  
 Invidit tibi nemo publicata  
 Castarum intima cogitationum,  
 Sanctarum abdita lucubrationum.  
 Invidit tibi nemo gratiam aula  
 Gratam gratiam eam et redintegratum ;  
 Grata ut gratia sit redintegrata.  
 Invidit tibi nemo propagatum  
 Sæpè a principe pænè principatum ;  
 Quanquam exorte cum honore principatum.  
 Nil horum tibi ego, tibi nec ullus



Natu grandior invidet, nec ullus  
 Unquam sanus : at invidemus omnes,  
 (Tantillum aut minimum invidere si fas,)  
 Quanquam non magis invidemus omnes,  
 Quam lugemus item et dolemus omnes  
 Istam præproperam hinc abitionem.  
 A nobis procul hinc abitionem,  
 Absque et spe reditus abitionem :  
 Nam antè ut venimus æquum abire et ante.

## DE ROLLOCI SCRIPTIS.

DUX Rolloce, viæ tenax repertæ,  
 Quæ fert sideream patens in aulam ;  
 Fidorumque ducum comes fidelis  
 Ursini et Junii, Tremelliique ;  
 Calvinique quoque, Bezae, Oleviani :  
 Queis vestigia præviis secutus  
 Signati ingenii notis stylique,  
 Tuto calle secas viam tenesque,  
 Certum certus iter sequente planta ;  
 Et pluma volucris poli sub auras,  
 Mire sedulus et laboriosus,  
 Scripta explens operosa ; ceu melissa  
 Cellis nectara stipat et recondit  
 Hausta è floribus aerisque rore,  
 Delibata poli deique dona.

ANDREAS MELVINUS.

## QUÆST.

PLEBS, Proceres, Princeps, quem cassum lumine lugent  
 Cur fata (heu) vivo nos vetuere frui ?

## RESP.

DIGNIOR ille fuit qui in caeli luceat aula :  
Luce hac orbari dignior orbis erat.

## ALIUD.

PORRIGERET pietas si vitam, hic debuit omnes  
Mortales mortis præteriisse mora.  
Sed quando hic obiit præcox, discamus et omnes  
Pertæsi hanc vitam posthuma secla sequi.

## ALIUD.

PECTORE, voce, manu, verum (vir sancte) colebas ;  
Et verum extincti nunc monimenta docent.

## ALIUD.

Hoc procul à tumulo commenta facessite vatum :  
Vera vir hic vivus, vera sepultus amat.  
Vana tegat fontes fucatæ gratia famæ ;  
Nil sibi fucari, nil avet iste tegi.  
Testor ego extincti manes, pia numina testor,  
Testor et innocuo si quis iniquus erat.  
Nullus ei quaesitus honos, opulentia nulla :  
(Nunc quibus, heu, pietas pestibus ægra gemit)  
Pro Tricis Apinisque habuit genus, atria, censum :  
Res vitæ, ad voti spes, ratus esse nihil.  
Stet modò majestas Christo sna sarta, salusque  
Humanum à Stygio vindicet hoste genus.  
Ergo reapse bonis cultus, probitate remissis  
Gratus, et indignis denique mirus erat.  
Nunc vitam hanc sanctam requies tam sancta coronat.  
Sydera tam certò nunc redivivus habet :

Nemo sequi ut sanus vivi vestigia nolit,  
Et propiore mori Numine nemo velit.

## EPIPHONEMA.

O TE satum fœliciter,  
Fotumque te fœliciùs,  
Funetumque fœlicissimè  
Noster Cato, Plato, Numa.

O ter beatum et amplius  
Et vita, et ortu, et funere,  
Quis te referret æmulus,  
Rolloce, noster indiges !

*Æternùm salve atque vale, - - -*

*- - - Decus addite Divis.*

HERCULES ROLLOCUS.

## ROBERTI ROLLOCI THEOLOGI EDENBURGENI MORS.

ROLLOCI æthereas emigratura per auras,  
Cùm foret ad summum meus pia, pura, polum :  
Mens mea perfer adhuc te cœco hoc carcere claudi :  
Exibis jam jam libera : carpe gradum ;  
Dixit : et erumpens istâ campagne solutâ  
Corporis exanimi mox videt ora Dei.

Epigramm. JOANNIS DUNBARI Cent. VI. 44.

[Lond. 1616, 8vo.]

UNTO THE TOWN AND KIRK OF EDINBURGH,  
 ANENT THE DEPARTURE OF THAIR MAIST  
 GODLIE, LEARNED, AND PAINFULL DOCTOUR  
 AND PASTOUR, M. ROBERT ROLLOK.

## SONNET I.

THY Divine Doctor deirest now is deid,  
 Thy peirles Preicher now hes plaide his part :  
 Thy painfull Pastor, quha in love did leid  
 Thy little Lambes, with sweit and tender hart,  
 Hes dried his dayes, with fair and bitter smart,  
 To purchase pleasand profit unto thee.  
 His words, his warks, his wayes, his vertues gart  
 Thee get this gaine of great felicitie.  
 How thou suld live, and how that thou suld die  
 IN Jesus Christ, he hes in word and deid  
 Declared and done unto thine eare and eye,  
 Als weill as thou could ever heare or reid.  
 O follow then, till thou atteyne to this,  
 And schaw a thankefull hart to him and his.

## II.

RICHT happie war his hearers when he lived,  
 And happie war his hearers at his dead :  
 Bot happier quha heiring baith, believed  
 That word of life, quhilk cannot fall nor fead.

I heare how humblit mekill dule was maid  
 Be all his hearers, at the buriall :  
 And justly ; for he stude them in great stead,  
 To leade them to the life eelestiall.  
 Bot let us Pastors, and you people all,  
 Hasten to that happines wherein he is :  
 Professing truly Christ, on quhom we call,  
 As he hes teacht and practised quhom we mis :  
 Sa sall the preassing to his halines,  
 Mak us attayne unto that happines.

## TO THE DEFUNCT.

OF Christ thou was the Pastor, and the sheip  
 That hard his voice, that lovinglie obeyit,  
 That fed his Lambis, and cairfullie them kept  
 With painfull labour, and na tyme delayit,  
 On Christ thy hart was haillie set and stayit ;  
 Of Christ thou ever thoecht, thou spak and wryte ;  
 With Christ thou wissed all thy warkis arrayit.  
 In Christ, in life and deid, was thy delyte.  
 Be Christ, nocht ellis, thou soecht to be perfyte ;  
 And finallie thy Christ to the was all,  
 Sa hes he cround in thee that wark sa greit,  
 And brocht thee his blis perpetuall.  
 O ! might I follow as I cleirlic see,  
 Thy rare example ! sa to live and die.

M. I. MELVILL.

CATALOGUS OPERUM D. ROBERTI ROLLOCI, QUORUM  
ALIQUA EXCUSA, ALIA MOX EXCUDENDA. [A. D. 1599].

EXCUSA.

- Prolegomena in primum librum Quæstionum Theodori Bezae.  
 Commentarius in Pauli Epistolam ad Ephesios [Edinburgi, 1590, 4to].  
 Commentarius in Danielem Prophetam [Edinburgi, 1591, 4to].  
 Analysis Logica in Pauli Epistolam ad Romanos [Edinburgi, 1594, 8vo].  
 Tractatus de Foedere Dei; et de Sacramentis [Edinburgi, 1596, 8vo].  
 Tractatus brevis de Providentia Dei.  
 Tractatus de Efficaci Vocatione [Edinburgi, 1597, 8vo].  
 Commentarius in utramque Pauli Epistolam : ad Thessalonicenses, et ad  
 Philemonem [Edinburgi, 1598, 8vo].  
 Commentarius in quindecim selectos Psalmos [Genevæ, 1599, 8vo].  
 Commentarius in Evangelium secundum Joannem [Genevæ, 1600, 8vo].  
 Conciones aliquot sermone vernaculo editæ [Sermons, &c. Edinburgh.  
 1599, 8vo].

MOX EXCUDENDA.

- Commentarius in Epistolam ad Colossenses [Edinburgi, 1600, 8vo].  
 Commentarius in Epistolas ad Corinthios [Herb. Nass. 1600, 8vo].  
 Analysis Logica in Epistolam ad Galatas [Londini, 1602, 8vo].  
 Analysis Logica in Epistolam ad Hebræos [Edinburgi, 1605, 8vo].  
 Commentarius in duo capita prioris Epistolæ Petri [Londini, 1603, 8vo].  
 Tractatus de Justificatione [ext. ad finem Anal. Log. in Epist. ad  
 Hebræos].  
 Tractatus de Excommunicatione [Londini, 1604, 8vo].





















